

Rau Tau Paulus Iboode Pa Yes Roma Rom—Romans

Paulus ipaesia tauu ve uraat tooni

¹ Yau Paulus nabood rau tane. Yau besoonja to Yesu Krisi. I tauu isiigh ghau namin le, ve ipoi ghau namin mbanjoona tooni, leso navotia vaaru poia to Maaron. *

² Vaaru poia tane itaghon saveen mbuaan tau muun Maaron ivotia ila yes propet tooni avozi, ve tibooode ila rau patabuyaana. *

³⁻⁴ Vaaru poia tane isavia Maaron Naatu Yesu Krisi. I Tiina toiti. I izilam taan ve imin tamtamon, ve i sinj to kinik David. Avuvu Patabuyaana ipaghazonjai ghiit pani ighe burigiin tooni ila mateegh, tauta itotoia ighe i Maaron Naatu, ve tapiri tiina kat. *

⁵ Ila uraat to Yesu Krisi, Maaron ighur ghau namin mbanjoona tooni itaghon tauu poia tooni. Leso naghham nughmarin tau Yuda mako na tighur ila tooni, ve titaghon aliina, ve tipaghazonjaini tigde i eeza tiina. *

⁶ Nugh nugh tau tighur ila to Krisi ve titaghon i aliina na, yam Roma aleep ila lolozi paam. Pasaa, Maaron ipoi gham amin Yesu Krisi le wa.

* **1:1:** Mbanj 9:15; Ga 1:15

* **1:2:** Lu 24:25+; Ro 15:8, 16:25+

* **1:3-4:** Mt 1:1+; Hib 1:5

* **1:5:** Mbanj 26:16+; Ro 16:26; 1Kor 15:9+; Ga 1:15+

⁷ Tauta nabood rau tane ilat pa yam Roma asov tau Maaron loolo igheen tsiam, ve ipoi gham gha amin tamtamon tooni patabuyaana.

Poia tomania luuma to Tamaan Maaron yesuru Tiina toit Yesu Krisi iza tsiam. Onoon. *

Paulus ngar tooni iyaryaan ighe ighita yes Roma

⁸ Saveen tsiau tau ilat payam imin maata, ene vene: Ghuruun ila tsiam, tamtamon tisasavia vaaru irau nugh naol isov. Tauta saawe tau matag ingal gham, lolog poia pa Maaron tsiau, ve napakuru ila Yesu eeza. *

⁹⁻¹⁰ Yau nabesbees pa Maaron toman lolog, ve navovotia vaaru poia to Naatu. I tauu ighit ghau ve iwatagh: Saveen tau naghe nasavia ne, ene onoon. Yau naghurghur gham ila sunuun tsiau irau saawe, ve naghaghasoni naghe ighur leg eez eta to nalat naghit gham. Ve isaav ighe i loolo tauvene, ene aat nalat. *

¹¹ Pasaa, yau naghe naghit gham, o poi. Leso napalot gham pa ngar ve tapiri tau Avuvu Patabuyaana igham payau ne, ve ayooz ariaan. *

¹² Yau naghe napalot gham, ve yam paam apalot ghau. Leso itinja tavapaloti ghiit pa ghuruun ila toit. *

¹³ Yam tonvetaz, yau naghe yam awatagh: Saawe naol, yau naghagham ngar naghe le nalat naghit gham. Pasaa, naghe uraat tsiau ighur anoonja popoia siriv ivot ila yam sosomim paam, imin

* **1:7:** 1Kor 1:2+; Ga 1:3 * **1:8:** Ro 16:19; Kol 1:3+ * **1:9-10:** 1Tes 3:10; 2Tim 1:3 * **1:11:** Ro 12:6+; 1Kor 12:7+ * **1:12:** Hib 10:24

nugh siriv to yes tau Yuda mako na. Eemon saawe isov tau naghe naburig, gabua siriv tiponpoon eez payau. Tauta nalat mako. *

¹⁴ Yau naghita naghe yau leg uraat to nauul tamtamon tisov. Yes Grika, ve yes kankanoonja tau tivot soone na paam. Ve yes tau lezi ngar tintiina, ve yes tau lezi ngar mako na paam. ¹⁵ Tauta lolog ipazaagh ghau naghe navotia vaaru poia pa yam Roma paam, o poi.

Vaaru poia le tapiri tiina

¹⁶ Yau mayag pa vaaru poia mako. Pasaa, Maaron tapiri igheen ila. Tapiri tawe ta igham mulin tamtamon tisov tau tighur ila to Krisi. Yes Yuda, ve yes tau Yuda mako na paam. *

¹⁷ Vaaru poia ipaghazonjai ghiit pa eez tau Maaron igham mulin ghiit itaghon saveen mbuaan tooni, ve igham ghiit taduduun ila i maata. Ene eez to ghuruun ila. Eez ite paam mako. Tamtamon tau ighe ighur ila to Krisi, ene aat Maaron ighita ighe iduduun ila i maata. Ene imin Maaron aliinja tau tiboode na isaav:

“Tamtamon tau ighe ighur ila, ene aat iduduun ila Maaron maata ve igham lepoogh poia ila tooni.” *

Maaron aatyavyav tooni injarui tamtamon tisov pa sosor toozi

¹⁸ Tamtamon tisov tau matazi ingal Maaron mako, ve tighamgham ngar sasaghati tau iduduun mako, ve titatan saveen onoon, ene Maaron tau

* **1:13:** Ro 15:22 * **1:16:** Mk 8:38; 1Kor 1:18+; 2Tim 1:8

* **1:17:** Hab 2:4; Ro 3:21+; Ga 3:11; Pil 3:9

ileep sambam na, itotoi aatyavyav tooni pazi, ve ighurghur atuya iza toozi. *

¹⁹⁻²⁰ Ve ngar tooni tane, ene iduduun. Pasaa, i itotoi tauu pazi gha tighazoon pa ngar tooni siriv wa. Onoon, tamtamon tighita Maaron pa matazi mako. Eemon saawe tau i ighur sambam ve taan ve ilam, yes tighitghita gabua naol tau i ighur zi na. Gabua tawe tipaghazonai tamtamon pani tighe i Maaron tauu, ve le tapiri tiina tau igheen irau saawe. Tauvene tamtamon irau tipasakaal tauzi mako. *

²¹ Pasaa, yes tiwatagh: Maaron ilepleep. Eemon tiroron pani mako. Matazi veleghini imin kaut sorok. Ve lolozi poia pani ve tipakuru pa gabua popoia naol tau i ighamgham pazi na mako. Tauta gabua naol tau lezi anonjazi mako na ikau ngar toozi le tivaghamgham. Ngar toozi ighazoon mako imin tileep ila ndoroom loolo. *

²² Tauzi tighe yes lezi ngar tiina. Eemon mako. Ngar toozi ivaghamgham imin yes borauna. *

²³ Pasaa, Maaron tau eeza tiina pa tapiri ve poia tooni, ve ileep irau saawe na, yes tibeas pani mako. Tighur murizi pani. Ve tizi gha tigharaat lezi gabua anunuzi tau imin man, ngai, moot, pariiv, ve tamtamon tau tileep rig ve timaat na anunuzi, ve tibeasbeas pazi. Tighur gabua soroksorok tawe timin maaron pazi. *

²⁴ Puughu tane ta Maaron ipul zi titaghon ngar sasaghati naol tau lolozi ighaar pani na, ve ngar

* **1:18:** Mbo 7:11; Yo 3:36; Ep 5:6; Kol 3:6 * **1:19-20:** Mbo 19:1+; Mbanj 14:17+ * **1:21:** Gnp 8:21; Ep 4:17+ * **1:22:** 1Kor 1:20, 27, 3:18+ * **1:23:** Lo 4:16+; Mbo 106:20; Mbanj 17:29

mayanja naol to uliin tau ingalaan mako na, ivotvot ila sosozi. *

²⁵ Saveenj onoon tau isavia Maaron tauu na, yes tipuli ileple, ve titaghon ngar karom. Ve gabua tau Maaron ighur zi tivot na, yes tighur zi timin maaron ve tibesbees pazi. Eemon iit aat tapait Maaron pa poia tooni irau saawe. Pasaa, i ta ighur gabua naol isov gha tivot. Onoon. *

²⁶ Tauvene yes tighur murizi pa Maaron, ve i ipul zi titaghon ngar sasaghati naol tau lolozi ighaar pani. Tauta tighamgham ngar mayanja naol tau iduduun mako na. Zilivaa tipul vain ngara duduun tau Maaron ighuru na, ve tigham borau pa zetazna zilivaa. *

²⁷ Ve yes zitamoot tauvene paam. Tipul ngar to vain zilivaa tau Maaron ighuru na, ve lolozi ighaar pa zetazna zitamoot, ve tigham borau pa mbolezi, ve tigham ngar mayanja naol. Tauvene tisor pa eez to Maaron, ve patanani tau ivot pazi ve ivaghamun zi, ene iyat sosor toozi tawe. *

²⁸ Yes lolozi iveegh kat pa Maaron, tauta ipul zi tila pa naghozi mon. Tauvene lezi ghilaloon muul mako, ve tighamgham ngar sasaghati naol tau iduduun mako. *

²⁹ Lolozi ivon kat pa ngar sasaghati maata maata tau iduduun mako. Matazi gabua, tighurghur koi pa tamtamon, lolozi ighaar kat pa gabua to zetazna, ve tilinlin sin pa tamtamon. Ve tivavazorai

* **1:24:** Mbo 81:12; 1Kor 6:18; Ep 4:19; 1Pe 4:3
 2:10; 1Yo 5:20 * **1:26:** Wkp 18:22+; Ep 5:11+
 19:5; 1Kor 6:9, 18 * **1:28:** Ro 1:22

* **1:25:** 2Tes
 * **1:27:** Gnp

zi, tighamgham karom, lolozi tighe le tivaghamunia tamtamon, ve tisisinai zetazña. *

³⁰ Yes tingalngal saveen pa zetazña, tighurghur koi pa Maaron, tipapakur tauzi, tivevelegh zetazña, tipapait tauzi ezazi, tipeipei ngar sasaghati paghpaaghu, ve tizoroor tamazña ma tinazña alinjazi.

³¹ Yes lezi ngar mako. Timin yes boraña. Ve tireureu saveen mbuaan toozi, tighur lolozi pa ziiri waaro toozi mako, ve lolozi isaghatin tamtamon mako. ³² Eemon yes tiwatagh: Maaron isaav pataghaan wa ighe yes tau tighamgham ngar tauvene, ene poia to timaat gha tilalez. Eemon mako. Tinoknoki soone. Ve isaav ighe zetazña siriv titaghon zi pa ngar toozi saghati tawe, ene igham zi lolozi poia ve tipait zi. *

2

Maaron pale igabiiz tamtamon tisov ve ighur atuya pazi

¹ Aiyo, yo sei ta ugagabiiz tamtamon ve ughe yes sasaghatizi na, yau leg saveen payo paam. Pasaa, ngar tau yes tighamghamu na, yo ughamghamu paam. Tauvene saveen tau usiki pazi na, ene imuul pa taum. Ve yo irau upasakaal taum mako. Pasaa, yo ughamgham sosor raraate imin yes. *

² Iit tawatagh: Yes tau tighamgham ngar sasaghati tauvene na, Maaron pale ighur atuya pazi. Ve ighe i igham tauvene, ene iduduun. *

³ Ughita. Yo ugagabiiz tamtamon ve ughe yes sasaghatizi. Eemon taum utaghon ngar raraate

* **1:29:** Ga 5:19+ * **1:32:** Mbo 50:18; Ro 6:21, 23 * **2:1:** Mt 7:1+; Yo 8:7+ * **2:2:** Ro 1:18

imin yes tighamghamu. Mindai, ughe Maaron pale ighurghur ghom? Mako kat! I aat iga-biiz ghom ve ighur atuya payo paam. ⁴ Ughita. Maaron itotoi poia tooni tiina kat payo. Pasaa, i itatan aate, ve ighur atuya payo rekia mako. Mindai, matam veleghin poia tooni tawe? Ughi-laal, ma mako? I igham tauvene, lesa igham gherev payo, ve utoor ngar tsio. *

⁵ Eemon ngar tsio iyaryaan kat, ve lolom pa utoora mako. Ngar tau yo ughamghamu na, ene imin undoundou lem atuya pa saghati tsio. Mbon Murei, Maaron pale itotoi aatyavyav tooni ivot ighazon, ve ighur atuya iyat dudunai tamtamon enaena sosor toozi. Saawe tana, aatyavyav tooni pale inarui ghom pa sosor tsio. *

Maaron pale ighur atuya pa tamtamon enaena itaghon ngar toz toz

⁶ Maaron pale ighur atuya pa tamtamon enaena itaghon ngar toz toz. *

⁷ Tauvene yes tau tiyooz ariaan pa badoon patanani ve tighamgham ngar popoia, ve tizuari zi tighe le Maaron tauu ipait zi ve tileep tomania ila mbonari loolo irau saawe, ene yes aat tigham lepoogh poia ila tooni taghon taghon gha ila. *

⁸ Eemon yes tau titaghon saveen onoon mako, ve matazi ingal tauzi mon, ve tighamgham ngar tau iduduun mako na, Maaron aatyavyav tooni tiina pale iza toozi, ve ighur patanani pazi. *

* **2:4:** Igham 34:6+; Ep 2:4+; 2Pe 3:9, 15 * **2:5:** Ro 1:18; Syg

6:17 * **2:6:** Mbo 62:12; 2Kor 5:10; Syg 22:12 * **2:7:** Mt 25:46

* **2:8:** Mt 7:18; Ro 1:18; 2Tes 1:8, 2:12

9 Tauvene tamtamon tisov tau tighamgham ngar sasaghati, ene pale patanjani tiina tomania yavyavuun igham zi. Pale igham yes Yuda imin maata, o yes tau Yuda mako anazi. ¹⁰ Eemon tamtamon tisov tau tighamgham ngar popoia, ene pale Maaron ipait zi, ve yesja tivalupu zi timin eemon, ve tileep poia ila mbonari loolo. I pale igham tauvene pa yes Yuda imin maata, o yes tau Yuda mako na anazi. *

¹¹ Pasaa, Maaron ivool to tamtamon eta mako. I ighamgham ngar raraate mon pa tamtamon tisov. *

¹² Onoon, yes tau Yuda mako na tikankaan pa tutuun to Mose. Eemon isaav ighe tisor ila Maaron maata, i pale ighur atuya pazi gha tilalez. Ve yes Yuda tileep ila tutuun to Mose saamba, ve tutuun tawe ighamgham pooz pazi. Tauvene Maaron pale igabiiz zi itaghon tutuun tana. ¹³ Ve tayamaan ghiit. Pa lonjaan tutuun mon irau igham ghiit taduduun ila Maaron maata ne mako. Iit aat tataghon tutuun, o taduduun ila i maata. *

¹⁴ Onoon, nugh nugh tau Yuda mako na, ti-watagh tutuun to Mose mako. Eemon muun ve ilam, yes paam lezi ghilaloon igheen ila lolozi. Ghilaloon toozi tawe ta ighamgham pooz pazi imin tutuun. *

¹⁵ Ghilaloon toozi tawe itotoi ighe Maaron ibood tutuun tooni ila lolozi wa. Tauta saawe tau tigham ngar saghati eta, tauzi tiyamaan tighe tigham

* **2:10:** Mbanj 10:34 * **2:11:** Ep 6:9; Kol 3:25; 1Pe 1:17 * **2:13:** Mt 7:21; Yems 1:22, 2:22+ * **2:14:** Mbanj 10:35

sosor. Ve saawe tau tigham ngar poia, tiyamaan tighe lezi sosor mako. *

¹⁶ Vaaru poia tau yau navovotia na, isaav tauvene: Saawe to Mbonj Murei, Yesu Krisi pale igham uraat to gabizoonj tau Taama Maaron ighuru ila niima na. Saawe tana, ngar ngozaanja isov to tamtamon pale ivot ighazoonj, ve i ighur atuya pazi. *

Yes Yuda timamalaan pa tutuunj to Maaron

¹⁷ Yo sei tau uwaat taum ughe yo Yuda, na yau leg saveenj payo paam. Pasaa, yo unumeer tutuunj to Mose ughe igham ghom ududuunj ila Maaron maata, ve upapait taum ughe yo uwatagh katin Maaron. *

¹⁸ Ngar tau Maaron loolo pani na, yo uwataghi. Ve gabua tau poia kat iliiv gabua naol isov, ene tutuunj ipaghazonjai ghom pani gha ughilaalo wa.

¹⁹⁻²⁰ Yo ugham ngar ughe ngar popoia ve saveenj onoon tau igheen ila tutuunj to Mose na, yo ughazoonj pani wa. Tauta unumeer ughe yo irau utotoi eez pa yes tau matazi kumkuuma na, ve umin gha-zoonja pa yes tau tileep ila ndoroom loolo. Ve ughe upaduduunj yes kankanooja, ve upaghazonjai yes tau ngar toozi ngaala soone na. *

²¹ Laak, yo tau ughe upaduduunj tamtamon siriv na, puughu mindai ta upaduduunj taum mako? Ughita. Yo uvovotia saveenj pa tamtamon ughe tium sov. Ve mindai pa yo taum? Uyummyum, ma mako? *

* **2:15:** Yer 31:31+; Hib 8:10 * **2:16:** Mbanj 10:42, 17:31; 2Kor 5:10 * **2:17:** Mt 3:9; Yo 5:45; Ro 9:4+ * **2:19-20:** Mt 15:14; Yo 9:40+ * **2:21:** Mbo 50:16+; Mt 23:3+

²² Ve usavsaav pa tamtamon ughe tighur boog sov. Taum ughurghur boog, ma mako? Ve ughe lolom pa maaron karomņa rigta mako kat. Mindai, uum gabua eta to rumei toozi, ma mako? *

²³ Yo tau upapait taum ughe uwatagh katin tutuun to Maaron na, mindai? Taum umalaan pa tutuun tawe rigta mako? Pa ighe umalaan pani, ene yo uvaghamunia Maaron eeza. ²⁴ Ngar tau ughamu na, tibood saveenja pataghaan wa. Tighe:

“Ngar tau yam aghamu na, ene imin puughu pa nugh nugh tau Yuda mako na tisiksik saveenj veleghiin pa Maaron.” *

Ngar to raviunj tamtamon warozi, ene gabua tauu mako. Gabua tauu, ene tataghon Maaron ngar tooni

²⁵ Isaav ighe utaghon dudunjai tutuun to Maaron, ene aat ngar to raviunj warom iuul ghom. Ve isaav ighe umamalaan pa tutuun tooni, ene aat uraat to raviunj warom imin kaut sorok, ve Maaron ighit ghom ighe yo raratem imin yes tau tirav warozi mako na. *

²⁶ Ve isaav ighe njeer eta tirav waaro mako, eemon maata kisin tutuun to Maaron ve itaghoni, ene aat Maaron ighita ighe i iduduunj ila i maata raraate imin yes tau tirav warozi na. *

²⁷ Onoon, tutuun tau tiboo de na, yam Yuda awataghi, ve tirav waromim wa. Eemon isaav ighe amamalaan pa tutuun, na ayamaan gham. Pa yes tau tirav warozi mako, eemon matazi kisin

* **2:22:** Mt 5:27+ * **2:24:** Ezek 36:20+; 2Pe 2:2 * **2:25:** Ga 5:3 * **2:26:** Ro 2:7, 10; Ga 5:6

tutuun to Maaron ve titaghoni na, yes aat tipagha-zonai sosor tsiam ivot ighazoon, ve Maaron ighur atuya tiina payam. *

²⁸⁻²⁹ Isaav ighe tamtamon eta ipamir tauu ighe i Yuda, eemon itaghon Maaron ngar tooni mako, ene i Yuda tauu mako. Pasaa, ngar tauu to yes Yuda, ene gabua to loloon. Ve uraat to ravuun tamtamon warozi tauvene paam. Ene gabua to uliin mon mako. Ene gabua to loloon. Maaron Avuvu igham ngar mungaana ilale, ve igham ngar paaghu ivot ila loloon. Gabua tauvene, tutuun tau tiboode na irau igham pait mako. Tamtamon tau ighe gabua tauvene ivot pani, i aat igham ngar pa pakuruun to tamtamon mako. I aat izuari ghi pa pakuruun tau ilam pa Maaron mon. *

3

Yuda siriv tighur murizi pa Maaron. Eemon i itataghon saveen mbuaan tooni

¹ Saveen tsiau tane aat ipaburigin ghasoniin tauvene: Mindai, yes Yuda lezi gabua eta to igham zi tiliiv tamtamon siriv, ma mako? Ve uraat to ravuun warozi paam, iuul zi mindai? ² Aghita. Maaron iuul yes Yuda ila eez maata maata. Gabua tiina kat tau i igham pazi, ene i ighur saveen tooni ila nimazi to tingini. *

³ Onoon, saveen tau timbua tomania Maaron na, tamtamon toozi siriv titaghoni mako. Ve mindai?

* **2:27:** Mt 12:41+ * **2:28-29:** Ro 9:6+; Ga 6:15; Pil 3:3; Kol 2:11+

* **3:2:** Mbo 147:19+; Mban 7:38; Ro 9:4

Ngar toozi tawe irau igham Maaron paam ireu saveen mbuaan tooni? *

⁴ Mako kat! Isaav ighe tamtamon tisov tigham karom, tigham karom lak! Eemon Maaron saveen tooni, ene onoon mon, ve i itataghon saveen mbuaan tooni irau saawe. Saveenja tiboode pataghaan wa. Tighe:

“Maaron, saveen isov tau usasavia na, tamtamon tighilaalo tige ene iduduun mon.

Ve isaav ighe koiamna tipayooz ghom pa savaaveen, ene aat uliiv zi.” *

⁵ Yau nawatagh. Zeran siriv tau titaghon ngar to taan na, pale tikau saveen tige: “Isaav ighe sosor toit ipaghazonai ngar duduuna to Maaron, puughu mindai ta i aate yavyav paıt ve ighur atuya pa sosor toit? Ngar tooni tawe, iduduun mako. Pa ighe iıt tagham sosor mako, ene aat i le eez eta to itotoi ngar tooni duduuna ivot ighazoon mako. *

⁶ Ngar tauvene irau mako kat! Isaav ighe Maaron itaghon ngar duduuna mako, pale igabiiz tamtamon tau tileep izi taan ne mindai?

⁷ Ve tamtamon ite pale inoon pa Maaron sorok ighe: “Ngar karom tau yau naghamu ne, ene iuul Maaron. Pasaa, ipaghazonai ngar tooni tau i aavo onoon na ivot ighazoon. Ve gabua tane ta igham tamtamon tipait eeza. Ve ighe tauvene, puughu mindai ta i igabiiz ghau ighe yau naghamsosor, ve ighur atuya payau?” ⁸ Ngar tauvene, ene imin saveen to yes tau ngar toozi ivaghamgham tige: Iıt tagham ngar sasaghati o poia. Leso Maaron

* **3:3:** Ro 11:29; 1Kor 1:9; 2Tim 2:13 * **3:4:** Mbo 51:4, 116:11

* **3:5:** Ro 3:8, 6:1, 15

ireua pait ve igham eeza tiina pa poia tooni. Yau nawatagh: Zeran siriv tingalngal saveen payau sorok tighes yau navovotia saveen tauvene pa tamtamon. Zeran tawe, Maaron tauu pale ighur atuya pazi. Ve isaav ighes i igham tauvene, ene aat iduduun.

Tamtamon tisov tipul eez to Maaron

⁹ Tauvene pale tasaav mindai? Yei Yuda niliiv yes tau Yuda mako na? Mako kat! Pasaa, yau navotia sosor toit ivot ighazon wa. Iit tasov taleep ila saghati loolo. Yes Yuda, ve yes tau Yuda mako na paam. *

¹⁰ Saveenja tiboode pataghaan wa. Tighe:

“Tamtamon eta iduduun ila Maaron maata mako. *

¹¹ Ve tamtamon eta le ghilaloon mako. Eta izuari ghi pa Maaron mako.

¹² Pasaa, tamtamon tisov tipul eez tooni wa. Tauta tivaghamgham, ve irau tigham uraat poia eta mako.

Toozi eta igham ngar poia mako. Tisov tisaghat mon.

¹³ Saveen mbuuzas tau ivotvot ila avosi na, ene imin naal tau aavo ikakaak.

Avozi karom, ve saveen toozi ivavaghamunia tamtamon imin moot saghati. Pasaa, saveen sasaghati naol ivotvot ila avosi. *

¹⁴ Tauvene avosi poia mako. Monmon tisiksik saveen sasaghati to tivaghamunia tamtamon. *

* **3:9:** Ro 1:18+; Ga 3:22 * **3:10:** Mbo 14:1, 53:1+ * **3:13:**

Mbo 5:9, 140:3 * **3:14:** Mbo 10:7

- 15 Saawe isov, tighe le tilinlin sin pa tamtamon.
 16 Yes titaghon eez to tivaghamunia tamtamon ve tighur patanani pazi.
 17 Tauvene eez to tavalupu ghiit tamin eemon ve taleep toman loloon luuma, ene yes tiwataghi rigta mako. *
 18 Ve Maaron paam, tiroi pani mako, matazi ingali rigta mako.” *

Eez to taghoniin tutuun irau igham tamtamon eta iduduun ila Maaron maata ne mako

19 Iit tawatagh: Saveen isov tau ighen ila tutuun to Mose na, ene inarui yes Yuda tau tileep ila tutuun tawe saamba. Eemon yes titaghon dudunai tutuun tana mako. Tauvene iit tamtamon tasov tau taleep izi taan ne, tutuun to Maaron ighen to ipoon avoon ve ipaburigin ngar toit. Leso taghilaal sosor toit, ve tawatagh taghe Maaron pale ighur atuya pait. *

20 Tauvene ngar to taghoniin tutuun, ene irau imin eez pa tamtamon eta to iduduun ila Maaron maata ne mako. Mako le mako kat. Tutuun ighen to ipaburigin ngar toit, lesa taghilaal sosor toit. *

Eez tau Maaron igham ghiit taduduun ila maata

21 Ve aazne, Maaron ivotia eez paaghu to igham mulin ghiit itaghon saveen mbuaan tooni, ve igham ghiit taduduun ila i maata. Eez tane, ene to taghoniin tutuun mako. Eemon tutuun ve saveen

* **3:17:** Is 59:7+; Lu 1:79 * **3:18:** Mbo 36:1 * **3:19:** Ro 3:9, 23, 4:15 * **3:20:** Mbo 143:2; Ro 7:7; Ga 2:16, 3:11

tau muun yes propet tisavia na, isavsaav pa eez tane.*

²²⁻²³ Eez tane, ene eez to ghuruun ıla. Tamtamon tisov tau tighur ıla to Yesu Krisi na, Maaron pale ighit zi ighe tiduduun ıla i maata. Yes Yuda, ve yes tau Yuda mako na paam. Pasaa, tamtamon eta iliiv iitete mako. Iit tasov rarateen mon. Tasov tasosor wa. Pasaa, tataghon Maaron gabua ve ngar tooni irao mako. Ngar ve lepoogh toit, ene itotoia ighe i eeza tiina ne mako.*

²⁴ Eemon poia to Maaron iliiv kat. Tauta loolo isaghatin ghiit, ve ighur leen eez ite to taduduun ıla maata. Eez tane ivot ıla tauun poia toit eta mako. Ene ivot ıla uraat to Yesu Krisi. I ibaad sosor toit atuya, ve ipas ghiit tavot pa saghati tapiri.*

²⁵ Maaron ighur Krisi to imaat imin watoonrau, leso sin tooni ireu sosor to tamtamon ve itatan aatyavyav to Maaron. Tauvene yes tau tighur ıla tooni na, i aat ireu sosor toozi isov ilale.

Yes tau muun tigham sosor na paam, Maaron loolo isaghatin zi, tauta ivaghamun zi mako ve ipul zi tileep. Ngar tooni tawe, ene iduduun. Pasaa, i iwatagh ighe murei Naatu pale ibaad sosor toozi atuya.*

²⁶ Ve aazne tauvene paam. Isaav ighe Maaron loolo isaghatin yes tau tighur ıla to Krisi na, ve ireu sosor toozi, ve igham zi tiduduun ıla i maata, ene iduduun. Pasaa, Krisi ibaad sosor toozi atuya wa.

²⁷ Ve ighe tauvene, sei irau ipait tauu ighe ngar

* **3:21:** Gnp 15:6; Mbanj 10:43; Ro 4:6; Pil 3:9 * **3:22-23:** Ro

1:17, 11:32; Ga 3:22 * **3:24:** Ro 5:1; Ep 1:7, 2:8; Kol 1:14; Tit 3:5

* **3:25:** Mbanj 13:38+; 2Kor 5:19; Kol 1:20

tau i ighamghamu, ene poia ila Maaron maata? Mako. Paitoon tauvene irau ivot muul mako. Pasaa, iit tataghon dudunai tutuun, o tapait tauun. Eemon aazne, iit tataghon eez to tutuun muul mako. Tataghon eez to ghuruun ila. *

²⁸ Pasaa, iit tawatagh: Ngar to taghoniin tutuun, ene irau igham ghiit taduduun ila Maaron maata mako. Ghuruun ila to it, tauta imin eez pait ve taduduun ila i maata. *

²⁹ Mindai, Maaron i Maaron to yes Yuda mon? Mako. I Maaron to yes tau Yuda mako na paam. *

³⁰ Pasaa, Maaron eemon ta ilepleep. Ve i ighur eez eemon pa tamtamon tisov to tiduduun ila i maata. Yes tau tirav warozi na, ve yes tau tirav warozi mako na paam. Eez eemon to tiduduun ila Maaron maata, ene ghuruun ila toozi. *

³¹ Mindai? Isaav ighe tapakur ghuruun ila to it imin gabua tiina, pale igham ghiit mataan veleghin tutuun to Maaron imin kaut sorok? Mako kat! Ghuruun ila to it, ene ipaburigin ghiit pa taghoniin dudunai tutuun ngara. *

4

Abaram yesuru David titotoi ghiit pa eez to ghuruun ila

¹ Aiyo, iit mataan ingal ila pa Abaram tau yei Yuda nivot ila tooni na. Pale tasaav mindai pani?

² I igham ngar popoia ve itaghon dudunai tutuun to

* **3:27:** 1Kor 1:29+; Ro 4:5; Ep 2:9 * **3:28:** Ro 3:20, 8:3; Ga 2:16;

Ep 2:8+ * **3:29:** Mbanj 10:34+; Ro 9:24, 10:12; Ga 3:28 * **3:30:**

Mbanj 15:9+; Ro 4:11+; Ga 3:8 * **3:31:** Mt 5:17; Ro 8:3-4; Ga 5:22+

Maaron, tauta Maaron ighita ighe i ñeer duduunja? Mako. Pa ighe tauvene, kanan i irau ipait tauu ila Maaron maata. ³ Eemon Maaron aliinja tau tiboode na, isaav ighe:

“Abaram ighur ila to Maaron, tauta Maaron ighita ighe i ñeer duduunja.” *

⁴ Isaav ighe tamtamon eta igham uraat, ve tigham le atuya, ene taghita taghe atuya tana tigham pani sorok mako. Ene tigholi pa uraat tooni. *

⁵ Ve tamtamon tau ighe inumeer ngar ve uraat popoia tau i ighamu na mako, ve ighur ila ighe Maaron mon irau igham iit tamtamon sasaghatiin taduduun ila i maata, ene tamtamon tauvene, ta Maaron pale ighita ghuruun ila tooni, ve iwaato ighe i ñeer duduunja. *

⁶ Kinik David paam isavia saveen raraate ighe: Yes tau uraat ve ngar toozi poia ila Maaron maata mako, eemon i ighit zi ighe tiduduun ila maata na, yes pale tintinizi pa poia tooni tau izaa toozi. Pasaa, saveen tooni ziiri ee isaav tauvene:

⁷ “Isaav ighe tamtamon eta izoor Maaron aliinja ve isosor pa eez tooni,
ve Maaron loolo isaghatini ve ireu sosor tooni,
ene aat tamtamon tana tintini pa poia to Maaron tau izaa tooni.

⁸ Onoon kat, isaav ighe Maaron ipul sosor to tamtamon eta, ve maata ingali muul mako,

* **4:3:** Gnp 15:6; Ga 3:6; Yems 2:23 * **4:4:** Ro 11:6 * **4:5:** Yo 6:29; 2Kor 5:21; Pil 3:9

ene aat tamtamon tana tintini pa poia to

Maaron tau iza tooni.” *

⁹ Ve savunugha ta poia to Maaron iza toozi? Yes Yuda mon tau tirav warozi na, ma nugh nugh tau tirav warozi mako na paam? Mataan ingal imuul ila pa Abaram. Yei nisavia wa: Ghuruun ila tooni, tauta Maaron ighita ighe i neer duduuna ee. ¹⁰ Laak, saawe sindei ta Maaron iwaat Abaram ighe i neer duduuna? Tirav waaro le isov, ra Maaron isaav pani tauvene? Mako. Maaron iwaato ighe i neer duduuna imin maata. Ve murei, ra tirav waaro. ¹¹ Tauvene saawe tau tirav waaro soone, ghuruun ila tooni ighamu iduduun ila Maaron maata. Ve murei ra, tirav waaro. Maaron isavia ngar to ravuun tamtamon warozi pa Abaram imin ilaal pa ghuruun ila tooni, leso ipaloti ve iwatagh kat ighe i iduduun ila Maaron maata. Tauvene yes tau tirav warozi mako, ve tighur ila, ve Maaron ighit zi ighe tiduduun ila maata na, tisov timin Abaram paaghu tooni. *

¹² Ve yes tau tirav warozi na paam. Ighe titaghon ngar to taman Abaram, ve tighur ila to Maaron imin Abaram ighur ila tooni indeen saawe tau tirav waaro soone, ene pale timin Abaram paaghu tooni.

Yes tau tighur ila, tauta tighita saveen mbuaan to Maaron anoonja

¹³ Muun, Maaron imbu saveen tomania Abaram ve paaghu tooni ighe i pale igham taan isov imin lezi. Laak, Abaram itaghon dudunai tutuun to Maaron, tauta i isavia saveen tane pani ne? Mako.

* **4:8:** Mbo 32:1+; 2Kor 5:19

* **4:11:** Gnp 17:10+; Ro 4:16+; Ga

3:7+

Maaron isavia saveen tane pani pasaa, Abaram ighur ila tooni, ve ghuruun ila tooni ighamu iduduun ila i maata. *

¹⁴ Isaav ighe yes tau titaghon dudunai tutuun, yes mon ta pale tighita saveen mbuaan to Maaron anoonja, ene pale ighur anoonja mindai? Mako. Pale imin kaut sorok. Ve ghuruun ila toit tau-vene paam. Imin kaut sorok. ¹⁵ Pasaa, tamtamon eta itaghon dudunai tutuun mako. Iit tasov tamamalaan pani. Tauta tutuun imin puughu pa aatyavyav to Maaron izazaa toit. Ve imin ta tutuun igheen mako, kanan irau tamalaan pani mako, ve leen sosor ila Maaron maata mako. *

¹⁶ Tauta Maaron igham poghani ghiit, ve ighur leen eez ite to taghita saveen mbuaan tooni anoonja. Ene ghuruun ila toit. Pasaa, ngar tooni iyaryaan ighe le saveen mbuaan tooni ighur anoonja pa Abaram paaghu tooni tisov. Yes Yuda tau titaghon tutuun to Mose na, ve yes tau Yuda mako tau titaghon Abaram pa ghuruun ila tooni na paam. Pasaa, iit tasov tau taghur ila to Krisi na, Abaram imin tamaan. *

¹⁷ Saveenja tiboode pataghaan wa. Tighe:

“Yau naghur ghom leso umin eval tiina to nugh nugh tamazi.” *

Aazne, saveen tane ighur anoonja pa iit tamtamon tau taghur ila to Krisi. Pasaa, Maaron ighit ghiit ighe iit tamin Abaram paaghu tooni. Abaram itotoi ghiit pa eez to ghuruun ila. Pasaa, i ighur ila to Maaron ighe i irau ipaburigin yes mateegha.

* **4:13:** Gnp 17:4+ * **4:15:** Ro 5:13, 7:7+; Ga 3:10, 18 * **4:16:**

Ro 3:24, 15:8; Ga 3:7, 22 * **4:17:** Gnp 17:4+

Ve ighur ila ighe Maaron isaav mon, ve gabua tau muunj tighen mako na, tivot. *

Abaram itotoi ghiit pa eez to ghuruunj ila

¹⁸ Muunj, Maaron imbu saveenj tomania Abaram ighe: “Paaghu tsio pale timasa timin ndinndin ndinndin.” Abaram iwatagh: Saveenj tawe irau ighur anoonja ivot ila tamtamon tapirizi mako. Eemon i ighur ila kat ighe Maaron tapiri pale igham gabua tawe ivot. Tauta ighurghur maata pani. Ghuruunj ila tooni iyaryaanj tauvene, tauta imin eval tiina to nugh nugh tamazi. *

¹⁹ Saawe tana, Abaram iwatagh: I imin koonj, ve tapiri imbool wa. Pasaa, ndaman tooni igharau pa ndinndin ee (100). Ve Sara paam imin olman tinazi. Saawe tooni to popaanj isov wa. Eemon Abaram iyooz ariaanj pa ghuruunj ila tooni. *

²⁰ Ve loolo ruru pa saveenj mbuaanj to Maaron mako. Ghuruunj ila tooni iyaryaanj le iyaryaanj kat. Tauta itotoi Maaron eeza tiina ivot ighazoonj.

²¹ Pasaa, Abaram ighur ila kat tauvene: Isaav ighe Maaron imbu saveenj pa gabua eta, ene i tapiri irau igham anoonja ivot. *

²² Abaram ghuruunj ila tooni iyaryaanj tauvene, tauta

“Maaron ighita ighe i neer duduunja ee.”

²³⁻²⁴ Saveenj ziiri tane, tiboode pa Abaram mon mako. Ene injarui ghiit paam. Pa ighe iit taghur

* **4:17:** Yo 5:21; Hib 11:3, 19 * **4:18:** Gnp 15:5 * **4:19:** Gnp 17:17, 18:11; Hib 11:11+ * **4:21:** Mt 19:26

ila to Maaron tau ipaburigin Tiina toit Yesu pa mateegh, ene i aat ighit ghiit ighe iit paam taduduun ila i maata. *

²⁵ Pasaa, sosor toit, tauta Maaron ipul Yesu ila tamtamon nimazi, gha tiravu imaat. Ve i ireu sosor toit, ve igham ghiit taduduun ila Maaron maata. Tauta Maaron ipaburigin pa mateegh. *

5

Aazne, itiŋa Maaron tavalupu ghiit tamin eemon wa

¹ Tauvene, iit tau taghur ila to Krisi, taduduun ila Maaron maata wa. Ve Tiina toit Yesu Krisi irav motin koi tau muun isap itiŋa Maaron sosoon na. I imin eez pait, tauta aazne itiŋa Maaron tavalupu ghiit tamin eemon wa. *

² Krisi ndaamo pait, tauta iit tau taghur ila tooni ne, irau tala tagharau Maaron, ve taleep ila poia tooni loolo. Ve loloon poia ve tintiniin pasaa, iit taghurghur mataan pa saawe to i igham ghiit tala taleep tomania ila mbonari loolo izi nugh sambam. *

³ Ve tane mon mako. Loloon poia ve tintiniin pa patanani naol tau tivotvot pait ne paam. Pasaa, iit tawatagh: Patanani toit ipariaan ghiit, leso tayooz ariaan. *

⁴ Ve isaav ighe tayooz ariaan pa badoon patanani, ene pale Maaron ighit ghiit ighe iit tarao. Ve ighe

* **4:23-24:** Ro 10:9, 15:4 * **4:25:** Ro 5:8-9; 2Kor 5:21 * **5:1:** Mban 10:36; Ro 3:28; 2Kor 5:19; Ep 2:13+; Kol 1:20 * **5:2:** Ep 2:17, 3:12; Hib 10:19 * **5:3:** Mban 5:41; 2Kor 12:10; Yems 1:2+; 1Pe 1:5+

tauvene, ene irau taghur mataan pa lepoogh poia tau i pale igham pait. *

⁵ Ve iit irau taghur mataan pani sorok ne mako. I pale igham lepoogh poia tawe pait. Pasaa, i igham Avuvu Patabuyaany pait wa. Ve Avuvu tawe ipavon ghiit pa poia to Maaron tauta tayamaan ila loloon taghe Maaron loolo igheen toit kat. *

⁶ Aghita. Muun, iit mataan ingal Maaron mako, ve leen tapiriin irau to tauul tauun mako. Eemon indeen saawe duduun tau Maaron tauu ighuru na, Yesu Krisi imaas pa iit tamtamon sasaghatiin. *

⁷ Tamtamon enjaenja aat irau tiyoki tauzi ve timaat pa tamtamon ite. Ve irau tigham tauvene pa tamtamon soroksorok mako. Neer tau ngar tooni iduduun ve poia kat, o yes irau tiyoki tauzi ve timaat pani. ⁸ Eemon Maaron ngar tooni ite. Saawe tau ngar to ghamuun sosor ikiskis ghiit soone, Krisi imaas pait. Ngar tooni tawe itotoi ighe Maaron loolo igheen toit kat. *

⁹ Ve ighe tauvene, iit tawatagh kat taghe: Krisi pale igham mulin ghiit pa aatyavyav to Maaron tau pale ivot pa Mbonj Murei na paam. Pa aazne, sinj tooni igham ghiit taduduun ila Maaron maata wa. *

¹⁰ Aghita. Muun, itinja Maaron tavaghuru koi pa tauun. Eemon mateegh to Naatu irav motin koi tawe, tauta aazne itinja Maaron tavalupu ghiit tamin eemon wa. Ve ighe tauvene, iit tawatagh

* **5:4:** Hib 6:18, 10:36; Yems 1:12 * **5:5:** Ro 8:15; Ga 4:6 * **5:6:**

Ro 4:25; Ga 4:4+; Kol 2:13 * **5:8:** Yo 3:16, 15:13; 1Pe 3:18; 1Yo 4:10

* **5:9:** 1Tes 1:10

kat taghe: Naatu tau iburig muul pa mateegh ve ileep maata yaryaare irau saawe na, i pale igham mulin ghiit pa aatyavyav to Maaron.*

¹¹ Ve tane mon mako. Iit tintiniin pa Maaron, ve tapaiti ila Tiina toit Yesu Krisi eeza. Pasaa, Krisi imin eez pait, tauta aazne, itiņa Maaron tavalupu ghiit tamin eemon wa.

Adam imin puughu pa mateegh, ve Krisi imin puughu pa lepoogh poia tau taghamu ila to Maaron

¹² Iit tawatagh: Muun, ñeer eemon igham sosor, tauta ñgar saghati ivot le irau taan isov. Sosor tooni, tauta igham tamtamon tisov tisaghat. Ve i ta imin puughu pa mateegh ivot le irau tamtamon tisov.*

¹³⁻¹⁴ Saawe to Adam, ve ilam imuul saawe tau Maaron isavia tutuun tooni pa yes Israela, tamtamon tau tileep izi taan na tighamgham sosor. Onoon, tigham sosor imin Adam mako. Pasaa, saawe tana, yes lezi ñgalsekiin eta imin Adam mako. Tauvene tutuun tau timalaan pani na, tighazonn pani mako. Ve tamtamon tau ighe ikankaan pa tutuun, ene Maaron irau maata kisin sosor tooni mako. Eemon saawe tana, tamtamon tisov tileep ila mateegh saamba, ve timatmaat. Pasaa, yes tileep ilon ila Adam sosor tooni loolo.

Tauvene Adam imin ilaal pa Ñeer tau ilam murei.*

¹⁵⁻¹⁶ Pasaa, Adam, i ñeer eemon. Ve saawe tau izoor Maaron aliin ve igham sosor, ene imin puughu pa mateegh igham tamtamon tisov. Yesu

* **5:10:** 2Kor 5:18+; Ep 2:16; Kol 1:20+ * **5:12:** Gnp 3:6, 19; Ro 6:23; 1Kor 15:21+ * **5:13-14:** 1Kor 15:21, 45

Krisi tauvene paam. I ñeer eemon. Ve ila uraat tooni, poia tiina to Maaron iza to eval tiina sorok, ve ireu sosor toozi. Tauvene poia tau Maaron itotoia pait, ve patañani tau ivot ila sosor to Adam, ene raratezi mako. Pasaa, sosor eemon geeg to Adam, ta ivaghamunia iit tasov, ve imin puughu pa Maaron ighur atuya pait. Eemon tamtamon tigham sosor katini ilam ilam le saawe to Yesu, ra Maaron igham poghani ghiit sorok itaghon tauu poia tooni, ve igham ghiit taduduun ila i maata. ¹⁷ Tauvene muun, Adam izoor Maaron aliiņa, tauta imin puughu pa tamtamon tisov tileep ila mateegh saamba ve timatmaat. Eemon poia to Maaron, ene tiina le tiina kat. Ve ñeer eemon ta imin eez pait tauta poia to Maaron iza to it, ene Yesu Krisi. Tauvene yes tau tigham poia to Maaron ila tooni, ve i igham zi tiduduun ila Maaron maata, ene aat tigham lepoogh poia ila tooni, ve tigham pooz imin kinik le alok. *

¹⁸⁻¹⁹ Tauvene onoon, Adam, i tamtamon eemon. Ve saawe tau izoor Maaron aliiņa, ve imalaan pa tutuun tooni, sosor tooni tawe, tauta imin puughu pa Maaron ighur atuya pa tamtamon tisov. Krisi tauvene paam. I ñeer eemon. Ve itaghon katin ngar duduunja, tauta igham eval tiina tiduduun ila Maaron maata, ve tigham lepoogh poia ila tooni. *

²⁰ Maaron igham tutuun pait, leso saghati to it ivot ighazon, ve taghilaal taghe iit zeran to ghamuun sosor. Onoon kat, iit tamtamon, sosor

* **5:17:** Yo 1:16, 10:10; Syg 22:5 * **5:18-19:** Ro 6:23; Pil 2:8; Hib 5:8+; 1Yo 2:2

toit tiina. Eemon poia to Maaron, ene tiina le tiina kat. Iliiv sosor toit. Ro 3:20, 7:7+

²¹ Tauvene muun, iit taleep ila ngar saghati saamba ve ngar saghati ighamgham pooz pait. Tauta igham mateegh ivot pait. Eemon aazne, Tiina toit Yesu Krisi igham ghiit taduduun ila Maaron maata wa. Tauta taleep ila poia to Maaron saamba, ve poia tooni ighamgham pooz pait. Leso tagham lepoogh poia ila tooni taghon taghon gha ila. *

6

Iit tapaak Krisi pa mateegh tooni, tauvene tapul ngar saghati ileple

¹ Aiyo, isaav ighe Maaron loolo isaghatin ghiit ve ireu sosor toit itaghon tauu poia tooni, ene pale tasaav mindai? Pale tanoknok ghamuun ngar saghati, lesa poia tooni tiina izaa toit? *

² Mako kat! Iit tau taghur ila to Krisi ne, tapul ngar saghati wa, imin yes mateegha. Pale tataghon eez saghati muul mindai? *

³ Yam awatagh mako? Saawe tau tagham yaa, itinja Yesu Krisi tavalupu ghiit tamin eemon ve tapaako pa mateegh tooni. *

⁴ Onoon kat, saawe tau tagham yaa, ene imin tamaat, ve titavi ghiit tomania Krisi. Leso laghoon tomania lepoogh toit imin paaghu, raraate imin Krisi imaat, ve Taama Maaron tapiri ipaburigini pa mateegh. *

* **5:21:** Yo 1:17; Ro 6:23 * **6:1:** Ro 3:5+ * **6:2:** Kol 3:3+; 1Pe 2:24 * **6:3:** Ga 2:20, 5:24 * **6:4:** 2Kor 5:17; Ep 2:5+; Ep 4:22+; Kol 2:12

⁵ Isaav ighe tapaak Krisi pa mateegh tooni, ve lepoogh toit munğaana isov, ene aat tapaako pa burigiin tooni paam, ve tagham lepoogh paaghu imin i igham lepoogh paaghu. *

⁶ Iit tawatagh: Loloon munğaana, ene tiravu tomania Yesu izala ai pambaroon wa. Leso ngar saghati tau ipapazaagh ghiit ne tapiri isov, ve tamin besoonja pani muul sov. *

⁷ Tamtamon tau ighe imaat wa, ene ngar saghati tapiri irau ikisi muul mako. *

⁸ Tauta iit taghur ila tauvene: Isaav ighe tapaak Krisi pa mateegh tooni, ene aat itinja Krisi taleep mataan yaryaare paam. *

⁹ Iit tawatagh: Maaron ipaburigin Krisi pa mateegh wa, ve irau imaat muul mako. Tauta mateegh ingini muul mako. *

¹⁰ Pasaa, i imaat pa sosor toit pai eemon, ve isov. Irau imaat muul mako. Ve aazne, i ileep to igham uraat itaghton Maaron loolo ve ngar tooni. *

¹¹ Yam tauvene paam. Agham ngar aghe: “Yei tau nipaak Yesu Krisi ne, nipul ngar saghati wa. Yei nimin yes mateegha tau irau tigham ngar saghati eta muul mako. Ve aazne, nileep to nigham uraat itaghton Maaron loolo ve ngar tooni.” *

¹² Yam awatagh: Murei, yam pale amaat. Tauvene apul ngar saghati igham pooz payam sov.

* **6:5:** Ro 8:11; Pil 3:10+; 2Tim 2:11 * **6:6:** Ga 2:19-20, 5:24; Kol 3:5
 * **6:7:** Ro 8:2; 2Kor 3:17; 1Pe 4:1 * **6:8:** Ro 8:11; 2Tim 2:11
 * **6:9:** Mbanj 2:24; Syg 1:18 * **6:10:** Hib 7:27, 9:28; 1Pe 3:18
 * **6:11:** 2Kor 5:14+; Ga 2:20; Kol 3:3+

Pale igherev gham ve ataghon ngar saghati tau lolomim ighaar pani na. *

¹³ Angin poghania anonamim siriv siriv, imin matamim, avomim, nimamim ma vene. Apul zi timin besoonja pa ngar saghati muul sov. Muun, yam aleep imin yes mateegha. Ve aazne, Maaron ipaburigin gham gha agham lepoogh paaghu ila tooni wa. Tauvene aghur taumim amin i le kat. Ve aghur anonamim siriv siriv tana tisov timin i le paam, leso timin besoonja pa ngar duduunja. *

¹⁴ Pasaa, yam aleep ila tutuun saamba muul mako. Yam aleep ila poia to Maaron saamba. Tauvene ngar saghati irau igham pooz payam muul mako. *

Lit tamin besoonja pa ngar saghati muul mako

¹⁵ Mindai? Isaav ighe iit taleep ila tutuun saamba muul mako, ve taleep ila poia to Maaron saamba, pale mataan sorok pa ghamuun ngar saghati? Mako kat! *

¹⁶ Yam awatagh mako? Isaav ighe aghur taumim ila tamtamon eta saamba, ve ataghon ngar tooni, ene yam amin besoonja tooni. Isaav ighe amin besoonja pa ngar saghati, ene pale igherev gham pa mateegh ve alalemim. Eemon isaav ighe amin besoonja pa Maaron, ve ataghon ngar tooni, ene aat igherev gham pa ghamuun ngar tau iduduun ila i maata. *

¹⁷ Muun, yam amin besoonja pa ngar saghati ve ngar tawe ighamgham pooz payam. Eemon iit

* **6:12:** Mbo 119:133 * **6:13:** Ro 12:1; 2Kor 5:14+; Kol 3:5

* **6:14:** Ro 7:4+; Ga 5:18; 1Yo 3:6 * **6:15:** Ro 6:1; 1Pe 2:16;

1Yo 3:9 * **6:16:** Yo 8:34; 2Pe 2:19

tapakur Maaron! Pasaa, saawe tau tipaghazonai gham pa saveen to Krisi, ve tighur gham aleep ila saveen tawe saamba, yam aghur ila, ve aghe ataghon duduunaini toman lolomim. ¹⁸ Saawe tana, Krisi ipas gham pa ngar saghati tapiri, ve amin besoonja pa ngar duduunja. *

¹⁹ Aazne, nasavia eez to Krisi iza to ngar tau yes besoonja tighamghamu na, leso iraurau payam to agham ngar pani. Aghita. Muun, yam apul anonamim siriv siriv timin besoonja pa ngar saghati. Tauta amalaan pa tutuun to Maaron, ve agham ngar naol tau ingalaan mako. Ve aazne, yam aat ataghon ngar raraate, ve apul anonamim siriv siriv tisov timin besoonja pa ngar duduunja to Maaron. Leso amin i le kat, ve ataghon ngar patabuyaana mon. *

²⁰ Saawe tau yam amin besoonja pa ngar saghati, ngar duduunja igham pooz payam mako.

²¹ Mindai? Ngar tau aghamu pa saawe tana, igham anoonja poia eta ivot payam? Mako kat. Aazne, matamim ingal imuul ila pani, ve mayamim. Pasaa, ngar tauvene pale igham ghiit tamaat gha talaleen. *

²² Eemon aazne, Maaron ipas gham pa ngar saghati tapiri, ve ngar tawe igham pooz payam muul mako. Ve yam amin besoonja to Maaron wa. Tauta aghita anoonja poia tauvene: Yam amin Maaron le kat, ve ataghon ngar patabuyaana. Ve murei, yam pale agham lepoogh poia ila tooni taghon taghon gha ila. *

* **6:18:** Yo 8:32; Ro 8:2 * **6:19:** Ro 12:1 * **6:21:** Ro 8:13; Pil

3:19 * **6:22:** 1Pe 1:9

²³ Ngar saghati atuya, ene mateegh. Eemon iit tau tapaak Tiina toit Yesu Krisi ne, Maaron igham poghani ghiit, ve igham leen lepoogh poia tau pale iseenja taghon taghon gha ila. *

7

Taleep ila eez to tutuun muul mako. Maaron Avuvu ta igham pooz pait

¹ Yam tonvetaz, tutuun ngara, yam awataghi wa. Tutuun ingin yes tau tileep matazi yaryaare mon. Ve yes mateegha, ene tutuun le saveen eta pazi mako. ² Imin zilivaa vaivaija. Tutuun isaav ighe: Yes aat tileep tomania azuwazja le azuwazja timaat. Eemon saawe tau azuwazja timaat, tutuun to vain ingin zi muul mako. *

³ Tauvene isaav ighe livaa eta azaawa ilepleep, ve livaa tana ipuli, ve ila igham tamoot paaghu, ene pale tiwaato tighe i livaa to ghuruun boog. Ve isaav ighe azaawa imaat, ve livaa tana ila ivai muul, ene irau tiwaato tauvene mako. Pasaa, mateegh to azaawa irav motin vain toozi, ve tutuun to vain ingini muul mako. *

⁴ Yam tonvetaz, ngar raraate mon ta ivot payam paam. Pasaa, yam tau apaak Krisi pa mateegh tooni na, aazne aleep ila eez to tutuun muul mako, ve amin tamtamon ite le wa. Ene neer tau Maaron ipaburigini pa mateegh, lesa tagham ngar popoia ivot pa Maaron. *

* **6:23:** Gnp 2:17; Ezek 18:4; Yo 3:16; Ro 5:12; Yems 1:15 * **7:2:**
 1Kor 7:39 * **7:3:** Mt 5:32; Lu 16:18 * **7:4:** Ro 6:3; Ga 2:19, 5:18+

⁵ Muun, saawe tau loloon munğaana ighamgham pooz pait, tutuun ipapazaagh ghiit pa ghamuun ngar sasaghati naol. Tauta anonjaan siriv siriv imin mataan, avoon, nimaan, ma vene, tighamgham ngar sasaghati naol. Ngar tauvene ta igham ghiit tamaat. *

⁶ Ve aazne, iit tapaak Krisi pa mateegh tooni. Tauta i ipas ghiit pa eez to taghoniin tutuun. Eez munğaana to tutuun tau tiboode na, iit tamin be-soonja pani muul mako. Tapuli wa. Ve aazne tabes-bees pa Maaron itaghon eez paaghu to Avuvu Patabuyaaj. *

Tutuun ipaburigin ngar toit, leso taghilaal sosor toit

⁷ Ighe tauvene, pale tasaav mindai? Tutuun, ene gabua saghati? Mako kat! Tutuun, ene gabua poia. Isaav ighe tutuun igheen mako, pale naghilaal sosor tsiau mindai? Imin ngar to loloon ighaar pa gabua to tamtamon. Tutuun to Maaron isaav ighe: “Lolom ighaar pa zetamja gabua toozi sov.” Tauta yau naghilaal naghe ngar tauvene isosor. Ve imin ta tutuun tane igheen mako, kanan nakankaan pa ngar tane. *

⁸ Eemon tutuun tane imin eez pa ngar saghati, tauta ipazaagh ghau gha lolog ighaar pa gabua naol. Ve imin ta tutuun tauvene igheen mako, kanan ngar saghati tapiri isov. ⁹ Tauvene saawe tau nakankaan pa tutuun to Maaron, yau naleep poia. Ve saawe tau tutuun ivot ve naghazonj pani, ene ipaburigin ngar saghati ila lolog. ¹⁰ Tauta

* **7:5:** Ro 6:21; Ga 5:19

* **7:6:** Ro 6:4, 8:2+; 2Kor 3:6

* **7:7:**

Igham 20:17; Ro 3:20

igham ghau naleep soghan pa Maaron, ve irav ghau namaat. Aghita. Tutuun tau Maaron ighuru leso tagham lepoogh poia, tauta igham mateegh ivot payau. *

¹¹ Pasaa, tutuun tawe imin eez pa ngar saghati, tauta itombaan ghau, ve irav ghau namaat. *

¹² Eemon tutuun, ene gabua patabuyaaj. Ve ngar tau tutuun isavia na paam. Ene patabuyaaj, duduunja, ve poia. *

¹³ Mindai, gabua poia tawe, ta irav ghau namaat ne? Mako kat! Ngar saghati ta irav ghau namaat. Aghita. Tutuun tau gabua poia, ene imin eez to ngar saghati irav ghau namaat. Pasaa, ngar saghati igherev ghau gha namalaaj pa tutuun. Tauta imin puughu pa Maaron ighur atuya payau gha namaat. Ene itotoi ighe ngar saghati, ene gabua saghati le saghati kat. *

Loloon munjaana iponpoon ghiit pa ghamuun ngar poia

¹⁴ Iit tawatagh: Tutuun, ene itaghon ngar to Maaron Avuvu. Eemon yau tamtamon to taan, ve lolog munjaana ighengheen tomani ghau soone. Tauta lepoghag ta aazne, ene imin ngar saghati ighol ghau gha namin besoonja pani. *

¹⁵ Yau nakankaan pa ngar tau naghhamghamu ne. Pasaa, ngar tau naghe nataghamoni, ene naghhamu mako. Ve ngar tau lolog pani mako kat ne, tauta naghhamghamu. *

* **7:10:** Gnp 2:16–3:7; Wkp 18:5 * **7:11:** Gnp 3:13 * **7:12:** Mbo 19:7+; 1Tim 1:8 * **7:13:** Ro 6:23 * **7:14:** Mbo 51:5; Ro 3:9, 6:15 * **7:15:** Ga 5:17; 1Yo 1:8+

¹⁶ Ngar saghati tau naghhamghamu ne, isaav ighe lolog pani mako, ene itotoi ghau ighe taug nayok pa tutuun to Maaron naghe ene gabua poia.

¹⁷ Tauvene ngar saghati tau naghhamghamu ne, taug lolog ve naghmu mako. Ngar saghati tau igheen ila lolog, tauta ipapazaagh ghau gha naghhamghamu. ¹⁸ Yau nawatagh: Ngar poia eta igheen ila lolog mako. Ene nasavia lolog mungaana. Pasaa, lolog naghe le naghmu ngar popoia mon. Eemon narao mako. *

¹⁹ Ngar popoia tau naghe naghmu zi, ene naghmu zi mako. Ve ngar sasaghati tau lolog pazi mako kat, tauta naghhamgham zi. ²⁰ Ngar sasaghati tau naghhamgham zi ne, isaav ighe lolog pa ghamuun zi mako, ene itotoi ighe taug lolog ve naghmu zi mako. Ngar saghati tau igheen ila lolog, tauta ipapazaagh ghau gha naghhamgham zi.

²¹ Yau naghita ngar tane ivotvot payau. Saawe tau naghe naghmu ngar poia eta, ngar saghati ighengheen ila loolo. ²² Yau lolog pa Maaron tutuun tooni kat, ve naghe le nataghon dudunaini. *

²³ Eemon naghilaal ngar ite igheen ila lolog paam, ve ighamgham pooz pa anong siriv siriv imin matag, avog, nimag, ma vene. Ngar tane tomania tutuun to Maaron tau ngar tsiau iyaryaan pani ne, tipaparav irau saawe. Ngar saghati tane ikis katin ghau ve ighamgham pooz payau. Irau ipul ghau mako. *

²⁴ Oyai, nakaria taug wa. Atuya to ngar saghati tane, ene mateegh! Sei ta pale ipas ghau pa

* **7:18:** Gnp 6:5, 8:21 * **7:22:** Mbo 119:35 * **7:23:** Ga 5:17; Yems 4:1

pataŋani tane? *

²⁵ Yau lolog poia pa Maaron ve napaiti pa poia tooni. Pasaa, ila Tiina toit Yesu Krisi uraat tooni, i pale iuul ghau. *

Tauvene ŋgar tsiau naghe namin besoonja pa Maaron, ve nataghon tutuun tooni. Eemon lolog muŋgaana tapiri tiina, tauta namin besoonja pa ŋgar saghati.

8

Lepoogh to yes tau titaghon pooz to Maaron Avuvu

¹⁻² Saveen naol tau nasavia ila wa, ene puughu tauvene: Iit tau tapaak Yesu Krisi ne, aazne leen puughu eta to Maaron ighur atuya pait mako. Pasaa, Maaron Avuvu tau taghamgham lepoogh poia ila tooni na, tapiri ipas ghiit pa ŋgar saghati ve mateegh tapiri wa. *

³ Tutuun, ene irau ipas ghiit tavot pa ŋgar saghati ve mateegh tapiri, ve igham ghiit taduduun ila Maaron maata ne mako. Pasaa, loloon muŋgaana, ene iravrav matin tapiriin. Eemon gabua tau tutuun irau ighamu mako, tauta Maaron tauu ighamu. Pasaa, i imbaan tauu Naatu izilam taan, gha igham lepoogh imin iit tamtamon sasaghatiin, ve tiini igham yavyavuun, ve imaat imin wa-toonrau to ireu sosor toit. *

⁴ Leso tagham ŋgar duduunja tau tutuun isavia na. Ene yau nasavia iit tamtamon tau tataghon ŋgar

* **7:24:** Ro 6:6, 8:2

* **7:25:** Yo 8:36; 1Kor 15:57

* **8:1-2:** Yo

8:36; Ro 6:18, 8:33+

* **8:3:** Mbanj 13:38+; Ro 7:18; 2Kor 5:21; Hib 10:1+

to loloon munḡaana mako, ve tataghon pooz to Maaron Avuvu. *

⁵ Tamtamon tau titaghon loloz i munḡaana na, matazi ingalṅgal ṅgar sasaghati to loloz i munḡaana mon. Eemon yes tau titaghon pooz to Maaron Avuvu na, matazi ingalṅgal gabua ve ṅgar to Maaron Avuvu. *

⁶ Yes tau matazi ilala pa ṅgar to loloz i munḡaana na, titaghon eez to mateegh. Ve yes tau matazi ilala pa gabua ve ṅgar to Maaron Avuvu na, tigham lepoogh poia ila to Maaron, ve tileep toman loloz i luuma. *

⁷ Isaav ighe tamtamon eta ṅgar tooni iyaryaṅ ighe itaghon loolo munḡaana, ene i ighur koi pa Maaron. Tamtamon tauvene loolo pa ileep ila tutuun to Maaron saamba mako. Isaav ighe itoova to itaghoni, ene aat irao mako. *

⁸ Tauvene yes tau titaghon loloz i munḡaana, ene irau tigham Maaron loolo poia ne mako. Mako le mako kat.

⁹ Eemon yam ataghon ṅgar to lolomim munḡaana muul mako. Pa isaav ighe onoon Maaron Avuvu ileep ila lolomim, i pale igham pooz payam. Ve tamtamon tau ighe Krisi Avuvu ileep ila loolo mako, ene i tamtamon to Krisi mako. *

¹⁰ Onoon, sosor toit ta imin puughu pa iit tasov tamatmaat. Eemon isaav ighe Krisi ileep ila lolomim, yam aat agham lepoogh poia ila to Avuvu Patabuyaṅ. Pasaa, Krisi igham gham

* **8:4:** Ro 3:31, 13:10; Ga 5:16, 25

* **8:5:** Yo 3:6; 1Kor 2:14+; Ga

5:19+ * **8:6:** Ro 5:1, 6:21+; Ga 6:8

* **8:7:** Kol 1:21; Yems 4:4

* **8:9:** 1Kor 3:16, 6:19; Ga 5:22+

aduduunj ila Maaron maata wa. ¹¹ Ve isaav ighe Maaron toit tau ipaburigin Yesu Krisi pa mateegh na, Avuvu ileep ila lolomim, i pale ipaburigin gham paam pa mateegh ila Avuvu tawe tapiri, ve aleep matamim yaryaare toman anonamim paaghu. *

Avuvu Patabuyaanj igham ghiit taghilaal taghe tamin Maaron natja

¹² Tauvene yam tonvetaz to Krisi, yam lelim puughu eta to ataghon ngar to lolomim mungaana muul mako. Yam aat ataghon ngar to Avuvu Patabuyaanj. *

¹³ Pa ighe ataghon ngar to lolomim mungaana, ene pale amatmaat gha alalemim. Ve isaav ighe agham tapirimim ila to Avuvu Patabuyaanj ve ar-avrav matin ngar sasaghati to lolomim mungaana, ene pale agham lepoogh poia ila to Maaron. *

¹⁴ Pasaa, tamtamon tisov tau titaghon pooz to Maaron Avuvu, ta timin Maaron natja. ¹⁵ Avuvu tau Maaron igham payam na, i irau igham gham amin yes besoonja sorok tau tiroiroi pa daaba toozi ne mako. I Avuvu tau igham ghiit tamin Maaron natja. Ve i ta igham ghiit tapoi Maaron taghe: “Abba! *
Taman!” *

* **8:11:** Ro 6:5; 1Kor 6:14; 2Kor 4:14 * **8:12:** Ro 6:14 * **8:13:** Ro 6:23; Ga 5:24, 6:8; Kol 3:5+ * **8:15:** Yes Israela natuznja geegeu tipoipoi tamaznja tigde: ‘Abba’, imin iit natuunja tipoipoi tamaznja tigde ‘Ama.’ Yesu paam ipoi Taama Maaron ighe ‘Abba.’ Ughita Mk 14:36. * **8:15:** Ga 4:6; 2Tim 1:7; 1Yo 4:18

16 Tauvene Avuvu Patabuyaany tauu isavsaav pait ila loloon, ve ipariaany ghiit to taghur ila taghe iit Maaron natja. *

Murei pale tala taleep tomania Maaron ila mbonari loolo

17 Isaav ighe iit Maaron natja, ene ezaan pa ghamuun gabua popoiazi naol tau Tamaan Maaron ighe irei zi pa tamtamon tooni. Ve iit mon mako. Itinja Kriisi pale tagham gabua tawe. Eemon iit aat tabaad patanjani pa Kriisi eeza, o murei itinja Kriisi taleep poia ila mbonari loolo izi nugh sambam. *

18 Patanjani naol tau aazne tivotvot ne, yau naghit zi naghe ene kaut sorok. Pasaa, saawe tau Maaron itotoi mbonari tomania tapiri ve poia tooni pait izi nugh sambam, gabua tawe pale iliiv kat pa patanjani toit naol isov. *

19 Aazne, gabua naol isov tau Maaron ighur zi na, tipasawal ve tighurghur matazi pa Maaron tighe le rekia mon ve tighit katin saawe to i ipavotvotin natja tivot mataghare. *

20-21 Aazne taghita gabua naol tau Maaron ighur zi na, tileep poi mako. Tisasaghat rekia, ve uraat toozi ilaan duduun itaghon Maaron ngar tooni mako. Gabua tawe titaghon tauzi lolozi ve tigham tauvene mako. Maaron tauu ipul zi tila saghati niima, tauta saghatiin ivot pazi. Eemon i igham ngar pazi paam ighe murei, i pale igham mulin zi, ve ipas zi tivot pa saghati tapiri. Leso timin

* **8:16:** Yo 1:12; 2Kor 1:22

* **8:17:** Ga 3:29, 4:7; Pil 1:29; Syg

21:7 * **8:18:** 2Kor 4:17

* **8:19:** Kol 3:4; 1Yo 3:2

paghpaaghu, ve tileep poia ila mbonari loolo imin iit tau tamin i natŋa. *

²² Iit tawatagh: Muuŋ ve ilam aazne, gabua naol isov tau Maaron ighur zi na, tiyamaan yavyavuun ve tiyakyak imin livaa tau ighe ipoop. ²³ Ve yes mon mako. Iit paam. Onoon, Maaron igham tauu Avuvu pait wa. Ene imin puughu pa gabua popoia naol tau murei pale tagham zi na. Eemon aazne, taleep toman patanani ve tatanan, ve tasanan saawe to Maaron ipas ghiit pa saghati tapiri, ve igham leen anonjan paaghu. Saawe tana ighe ivot, mako i ipavotvotin ghiit ighe: “Ene yau natugŋa.” *

²⁴ Onoon, Maaron igham mulin ghiit wa. Eemon taghit katin anoonja soone. Tauta aazne, taghurghur mataan pani ve talepleep. Ve imin ta anoonja ivot wa, kanan irau taghur mataan pani muul mako. Pa ighe gabua eta ivot, sei pale ighur maata pani muul? *

²⁵ Lepoogh poia tau taghurghur mataan pani ne, iit taghit katini soone. Eemon iit tawatagh: Maaron pale igham pait. Tauta tayooz ariaan, ve tasasan mon. *

Maaron Avuvu ipaduduun sunuun toit

²⁶ Onoon, iit tamtamon to taan, tapiriin imbool. Ve saawe naol, takankaan: Pale tasun mindai, leso sunuun toit iduduun pa Maaron ngar tooni. Ve ngar siriv tau igheen ila loloon ne, ene ipatanan pa tasavia ila sunuun toit. Eemon Avuvu Patabuyaana

* **8:20-21:** Gnp 3:17+; 2Pe 3:13; Syg 21:1 * **8:23:** 2Kor 5:2+; Pil 1:23, 3:21 * **8:24:** 2Kor 5:7 * **8:25:** Hib 11:1

iuluul ghiit, ve ipapaduduun sunuun toit inajarui Tamaan Maaron. *

²⁷ Maaron itirtiir iit tasov loloon, ve iwatagh Avuvu Patabuyaaj ngar tooni paam. I iwatagh: Saawe tau Avuvu Patabuyaaj ighur iit tamtamon to Maaron ila sunuun tooni, i isunsun itaghon Maaron loolo.

Gabua eta irau ivaghamun ghiit kat ne mako

²⁸ Iit tawatagh: Gabua naol isov tau tivotvot ne, Maaron itortoor zi timin gabua popoia pa yes tau lolozigheen tooni. Ene yes tau i ipoi zi timin le itaghon tauu ngar tooni. *

²⁹ Pasaa, yes ta i tauu isiigh zi pataghaan, tauta ngar tooni iyaryaaj pazi ighe igham uratoi zi, lee tigham katin ngar to Naatu Yesu Krisi. Leso i imin aidaaba, ve imuun pa tazja ve livja katini tawe. *

³⁰ Ve yes ta Maaron ngar tooni iyaryaaj pazi, tauta ipoi zi timin le. Ve yes tau ipoi zi timin le, tauta igham zi tiduduun ila i maata. Ve yes tau igham zi tiduduun ila maata na, i aat ikis zi tileep tunja ila tooni ila le igham zi tila tileep tomania ila mbonari loolo izi nugh sambam. *

Gabua eta irau irav motin ghiit pa Maaron mako

³¹ Laak, isaav ighe Maaron igham tauvene pait, pale tasaav mindai? Ighe i tauu ivool toit, sei irau ivaghamun ghiit? Mako. *

³² Aghita. Maaron inguruut tauu Naatu pait mako. I ipuli izilam taan, ve igham niaan gha imaat

* **8:26:** Yo 14:16; Ep 6:18 * **8:28:** Gnp 50:20; 2Tim 1:9 * **8:29:**

2Kor 3:18; Ep 1:5; Kol 1:15+; 1Pe 1:2 * **8:30:** Yo 10:28+; 1Kor 6:11

* **8:31:** Mbo 56:4; Hib 13:6

pait. Ighe tauvene, Maaron pale igham leen gabua tooni popoia ta naol ne, raraate imin igham Naatu pait. *

³³ Ve iit tamtamon tau Maaron isiigh ghiit tamin i le na, sei pale ipayooz ghiit pa savsaveen? Mako. Pasaa, Maaron tauu igham ghiit taduduun ila i maata wa. *

³⁴ Ve sei pale ighur atuya pait pa sosor toit? Mako. Pasaa, Yesu Krisi imaata pa sosor toit, ve Maaron ipaburigini pa mateegh wa. Ve aazne, i ilepleep ila Maaron niima tapir, ve sunjuun tooni inajarui Taama pait. *

³⁵ Aghita. Krisi loolo igheen toit kat. Tauvene saa gabua irau irav motin ghiit pani? Mako. Patanani maata maata tau tivotvot pait imin taleep saghat, ma tamtamon tighur patanani pait pasaa tataghon Krisi, ma pitoon ghiit, ma mbolaan igham ghiit, ma tirav ghiit pa mbuzaagh, ma saghatiin ite paam, gabua eta tauvene irau irav motin ghiit pa Krisi mako. ³⁶ Onoon, patanani naol tane tivotvot pait. Saveenja tibooode pataghaan tauvene:

“Yei nimin lem wa. Tauta saawe isov, tiravrav sorokin ghei gha nimatmaat.

Yes tighit ghei nimin sipsip tau timbit zi pa ravuun zi.” *

³⁷ Eemon patanani naol tane irau tivaghamun ghiit mako. Pasaa, Krisi loolo igheen toit kat, ve igham ghiit taliiv zi. *

* **8:32:** Yo 3:16 * **8:33:** Is 50:8+ * **8:34:** Mbo 110:1; Ro 8:1; Hib 7:24+; 1Yo 2:1 * **8:36:** Mbo 44:22; 1Kor 4:9, 15:30+ * **8:37:** Yo 16:33; 1Kor 15:57; 2Kor 2:14; 1Yo 4:4; Syg 12:11

38-39 Tauvene yau naghur ila kat tauvene: Iit tau tapaak Tiina toit Yesu Krisi ne, Maaron loolo igheen toit kat, ve gabua eta irau irav motin ghiit pani mako. Mateegh, ma lepoghaan to taan, anela eta, avuvu saghati eta, gabua tau lezi tapirizi tiina, ngar tau aazne ivotvot ne, ngar tau murei pale ivot na, gabua tau tileep saanja, ma gabua tau tileep siinja kat, gabua tisov tau Maaron ighur zi na, eta irau irav motin ghiit pa Maaron toit tau ighur loolo pait kat ne mako. Mako le mako kat.

9

Paulus loolo ipatanjan kat pa yes Israela tau tighur ila to Krisi mako

¹ Saveen tau yau naghe nasavia, ene karom mako. Ene saveen onoon, ve nasavia toman lolog. Pasaa, yau tamtamon to Krisi. Ve Avuvu Patabuyaany tau ighamgham pooz payau ne, i igham ghau nayamaan ila lolog naghe saveen tane, ene onoon mon. ²⁻³ Saawe isov, yau naleep toman lolog ipatanjan kat ve natantjan pa yes Israela. Pasaa, yes tamtamon tsiau, ve puughu tsiei eemon. Tauvene lolog iyaryaan kat naghe Maaron igham mulin zi, o poi. Isaav ighe Maaron irau ipasalia aatyavyav tooni pazi, ve ighuru iza tsiau, ene poia mon. Ve ighe eez ite paam to iuul zi mako, ene yau irau nayoki taug, ve Maaron irav motin ghau pa Krisi gha nalaleg. *

⁴ Yes Israela, Maaron igham gabua popoia naol pazi. I igham zi timin i natnja. Ve muun, i ilepleep

* 9:2-3: Igham 32:32; Ro 10:1

ila sosozi, ve itotoi tapiri ve poia tooni pazi. Pai katiini, Maaron imbu saveen tomani zi leso tivalupu zi timin eemon. Yes ta tigham tutuun tooni. Ve Maaron itotoi sunuun ngara pazi leso titaghoni ila rumei loolo, ve imbu saveen tomani zi pa gabua naol. *

⁵ Yes tivot ila to timbuzna Abaram, Isak, ve Yakop. Ve sin toozi tawe iseen ga ilam ilam le aazne Krisi ivot ila toozi. Krisi, i Maaron, ve gabua naol isov tileep ila i saamba. Tauvene iit aat tapait eeza irau saawe. Onoon. *

Abaram paaghu tooni siriv, yes Israela duduun. Ve siriv mako

⁶ Onoon, aazne Israela katini tighur ila to Krisi mako. Tauvene pale tasaav mindai pa saveen tau Maaron imbua tomania timbuzna na, saveen tawe imin yaghur sorok? Mako. Pasaa, tamtamon tau tivot ila to yes Israela na, tisov timin Israela duduun mako. *

⁷ Ve Abaram paaghu tooni tauvene paam. Yes tau tivot ila to Abaram na, tisov timin paaghu tooni duduun mako. Pa muun, Maaron isaav pa Abaram ighe:

“Paaghu tsio duduun pale tivot ila to natum Isak mon.” *

⁸ Saveen tane, ngara tauvene: Yes tau tivot ila sin to Abaram na, tisov timin Maaron natja mako. Yes tau tivot itaghon saveen mbuaan tooni, ene yes mon ta i ighit zi ighe i natja. *

* **9:4:** Gnp 17:2, 28:14+; Igham 4:22, 19:5

1:1; Ro 1:3, 11:28

* **9:6:** Yo 8:39+; Ro 2:28+
Hib 11:18 * **9:8:** Ga 3:29, 4:23, 28

* **9:5:** Mt 1:1+; Yo

* **9:7:** Gnp 21:12;

⁹ Pa muun, Maaron imbu saveen tomania Abaram ighe:

“Ndaman murei, saawe raraate tauvene, azuwam Sara pale ipoop lem natum tamoot le isov, o yau namuul nalam.” *

Maaron isiigh tamtamon timin le itaghon tauu loolo

¹⁰ Ve tane mon mako. Matamim ingal imuul ila pa timbumai Isak ve azaawa Rebeka paam. Rebeka ipoop bogboog. ¹¹⁻¹² Saawe tau ipoop natja ru tawe soone, Maaron isaav pani ighe:

“Murei, natum aidaaba pale imin besoonja pa neer muria.” *

Saawe tau Maaron isavia saveen tane, geegeu ru tana tigham ngar poia eta ma saghati eta soone. Maaron igham ngar tane, leso itotoi eez tau i isiigh le tamtamon. Pa ighe i isiigh tamtamon eta imin le, ene puughu igheen ila tamtamon tana tauu ngar tooni, ma uraat tooni eta ne mako. Maaron itaghon tauu loolo ve ngar tooni, ve igham tamtamon tana imin le. *

¹³ Ve Maaron saveen tooni ziiri ite isavia ngar raraate mon. Ighe:

“Yau lolog igheen to Yakop ve naghamu pa uraat tsiau. Ve Esau, yau matag ila pani mako. Napuli ileep.” *

¹⁴ Ighe tauvene, pale tasaav mindai? Maaron ngar tooni iduduun mako? Tagham ngar tauvene sov. *

* **9:9:** Gnp 18:10, 14 * **9:11-12:** Gnp 25:23 * **9:11-12:** Ro 8:29+; Ep 2:8 * **9:13:** Mal 1:2+ * **9:14:** Lo 32:4; Mbo 92:15

15 Pa aghita. Muun, Maaron isaav pa Mose ighe:
 “Ngar to lolog isaghatin tamtamon, ene igheen
 to yau taug. Isaav ighe ateg waaro tamta-
 mon eta, ve naghe nareu sosor tooni, ene
 aat naghām tauvene. Ve isaav ighe lolog
 isaghatin tamtamon eta ve lolog pa uleen, ni,
 ene aat nauule.” *

16 Tauvene Maaron ighita tamtamon lolozi ve ngar
 tau tizuari zi pani, ve igham zi timin le ne mako.
 Isaav ighe loolo isaghatin tamtamon eta ve isiigho
 imin le, ene i itaghon tauu loolo. *

17 Ve Maaron aliin, ziiri ite tau tiboode na, isaav
 tauvene: Muun, Maaron isaav pa kinik to yes Isipa
 ighe:

“Yau taug naghur ghom umin kinik, leso umin
 eez payau to natotoi tapirig ivot ighazon,
 ve murei tivotia varug irau taan isov.” *

18 Tauvene Maaron itataghon tauu loolo. Isaav
 ighe loolo pa uleen tamtamon eta, ene aat loolo
 isaghatini ve ireu sosor tooni. Ve ighe loolo pa
 igham tamtamon eta ngar tooni iyaryaan kat, leso
 izoor i aliin, ene i irau igham tauvene paam. *

Aatyavyav to Maaron ve poia tooni

19 Tamtamon tsiam eta pale ighason ghau ighe:
 “Wai, isaav ighe Maaron ighamgham tauvene,
 puughu mindai ta i ighe iit leen sosor pa ngar
 sasaghati tau taghamgham zi ne? Isaav ighe i
 loolo pa ngar eta ivot, sei irau izoora pa ngar tooni
 tana?”

* 9:15: Igham 33:19 * 9:16: Ep 2:8+; 2Tim 1:9; Tit 3:5 * 9:17:
 Igham 9:16 * 9:18: Igham 4:21, 7:3; Yo 12:40; Ro 11:25

²⁰ Ve yau aat nayol ghasoniinj tooni tauvene: “Yo saa njeer ta ughe urere Maaron pa ngar tooni? Mindai, uur eta irau isaav pa tamtamon tau ibu-uda na ighe: ‘Puughu mindai ta yo ugharaat ghau tauvene?’ ” Ene aat mako. *

²¹ Tamtamon to ravuunj uur ighagharaat zi itaghon tauu loolo. Pasaa, i eeza pa uraat tawe. Tauvene saawe tau i ibuud taan, i irau irav uur siriv pa uraat tintiina. Ve uur siriv, i irav zi pa uraat soroksorok. *

²² Maaron ighamgham tauvene paam. I ighe ipaghazonjai tamtamon pa tapiri, ve itotoi aatyavyav tooni pa ngar saghati. Tauta ighur tamtamon siriv, leso aatyavyav tooni izaa toozi gha tilalez. Eemon i ivaghamun zi rekia mako. I itatan aate, ve isasaŋan zi. ²³ Ve i ighe ipaghazonjai tamtamon pa eeza tiina tomania poia tooni paam. Tauta tamtamon siriv, i ighur zi, leso loolo isaghatin zi ve igham zi tila tileep tomania ila mbonari loolo. ²⁴ Ene nasavia iit tau Maaron ipoi ghiit tamin le na. Iit Yuda, ve yes tau Yuda mako na paam. ²⁵ Saveeŋa, propet Hosea isavia muunj wa. Ighe:

“Yes tau tamtamon tsiau mako na, yau aat nawaat zi naghe ‘tamtamon tsiau.’

Ve yes tau muunj lolog igheen toozi mako na, yau aat nasaav pazi naghe: ‘Yau lolog igheen tsiam.’ *

²⁶ Ve nugh tau muunj tamtamon tileep pani, ve Maaron isaav pazi ighe: ‘Yam tamtamon tsiau mako,’

* **9:20:** Is 45:9, 64:8 * **9:21:** 2Tim 2:20 * **9:25:** Hos 2:23;
1Pe 2:10

nugh tawe tamtamona, ta pale tiwaat zi tighe
Maaron maata yaryaare natŋa.” *

²⁷ Propet Isaia paam ivotia saveeŋ iŋarui yes Israela ighe:

“Onoon, yes Israela, tamtamon toozi ndiŋndiŋ
ndiŋndiŋ imin sausau to te. Eemon tamta-
mon toozi tau yau pale naghām mulin zi na,
yes naol mako. Enjaeŋa mon.” *

²⁸ Pasaa, Maaron irau isaan mako. Atuya tau i
ighe ighuru pa tamtamon to taan na, i aat igham
uratoini rekia mon, ve ighuru isov iza toozi.

²⁹ Ene itaghon saveeŋ ziiri ite tau propet Isaia
ivotia na ighe:

“Imin ta Maaron saksaki ighurghur tamta-
mon to it siriv mako, kanaan iit tasov talaleen
imin yes Sodoma ve Gomora.” *

Yes Israela tisor pa eez to ghuruuŋ ila

³⁰ Tauvene pale tasaav mindai? Nugh nugh tau
muuŋ tizuari zi to tiduduun ila Maaron maata
mako, tauta aazne tighur ila to Krisi, ve i igham zi
tiduduun ila Maaron maata wa. *

³¹ Eemon yes Yuda tau tizuzuari zi tighe le
titaghon dudunai tutuun to Mose, leso tiduduun
ila Maaron maata na, titooova le tirao mako. *

³² Pasaa, lolozi pa taghoniin eez to ghuruuŋ
ila mako, ve tighe uraat ve ngar popoia tau
tighamgham zi na, pale igham zi tiduduun ila

* **9:26:** Hos 1:10 * **9:27:** Gnp 22:17; Is 10:22+; Ro 11:5 * **9:29:**
Is 1:9 * **9:30:** Ro 1:16, 3:22, 4:5; Ga 2:16; Pil 3:9 * **9:31:** Ro
10:2, 11:7; Ga 5:4

Maaron maata. Tauta timin tamtamon tau itut aaghe ila maet, ve itap. *

³³ Ngar tau tighamu na, saveeja tiboode pataghaan wa. Isaav tauvene:

“Aghita. Yau naghur maet ee igheen izi loloz Zion.

Maet tawe, tamtamon siriv pale titut aghezi ila, ve titaptap.

Eemon tamtamon tisor tau tighur ila tooni, ene pale tighita ghuruun ila toozi anoona. Eta irau ighur maata pani sorok ne mako.”

*

10

Yes Israela tighazon pa Maaron eez tooni soone

¹ Yam tonvetaz, yau naghama ngar tiina kat pa yes Israela naghe le Maaron igham mulin zi, o poi. Tauta saawe isov, sunuun tsiau inajarui Maaron pazi. *

² Yau nawatagh katin zi, tauvene yau irau nasavia gabuazi. Onoon, ngar toozi iyaryaan kat tige le titaghon duduunai eez to Maaron. Eemon tighazon kat pa Maaron loolo ve ngar tooni mako. Tauta tisor pa eez tooni. *

³ Pasaa, eez tau Maaron igham ghiit taduduun ila i maata, ene tighilaalo soone. Tauta tisor eez tooni tawe, ve tiyooz ila eez to taghoniin tutuun tige ngar tawe pale igham zi tiduduun ila Maaron maata. *

* **9:32:** Lu 2:34; 1Kor 1:23

1Pe 2:6+

* **10:1:** Ro 9:3

* **9:33:** Mbo 118:22; Is 8:14, 28:16;

* **10:2:** Mban 21:20

* **10:3:** Ro

9:31+; Pil 3:9

⁴ Eemon Kriisi igham tutuun to Mose anoonja ivot wa. Tauvene eez to taghoniin tutuun ilam imuul izi tooni. Pasaa, tamtamon tisov tau tighur ila tooni na, timin tamtamon dudunazi ila Maaron maata. *

Eez to taghur ila, leso taduduun ila Maaron maata

⁵ Eez to taghoniin tutuun leso taduduun ila Maaron maata, ene ipatanan. Muun, Mose ibood saveenja ighe: “Tamtamon tau ighe itaghon dudunai tutuun, ene aat ileep poia.” *

⁶ Ve eez to taghur ila, leso taduduun ila Maaron maata, ene raurauai. Pasaa, isaav pait tauvene: “Yo usaav ila lolom ughe: ‘Sei irau izala nugh sambam?’ Vene sov. Pa Maaron imbaan Kriisi izilam taan wa. Yo ughe ughamu imuul izilam pasaa?” ⁷ Ve usaav ughe: ‘Sei irau izila nugh to mateegha, ve ipaburigin Kriisi?’ Vene paam sov. Pa Maaron ipaburigin Kriisi pa mateegh wa. Yo ughe upaburigini muul pasaa?” ⁸ Saveen tane, ngara tauvene:

“Maaron saveen tooni igheen malau pait mako. Pasaa, igheen ila avoon ve loloon wa.” *

Laak, saa saveen? Ene saveen tau yei nivovotia pa eez to ghuruun ila. ⁹ Saveen tawe isaav pait tauvene: Isaav ighe taum avom uvotia ghuruun ila tsio ila eval tiina matazi ve ughe: “Yesu, i Tiina

* **10:4:** Mt 5:17; 2Kor 3:6; Ga 3:24+; Hib 8:13 * **10:5:** Wkp 18:5; Lu 10:27+; Ga 3:12 * **10:8:** Lo 30:11-14

tsiau,” ve ighe lolom ighur ila ughe Maaron ipaburiginini pa mateegh wa, ene aat Maaron igham mulin ghom, ve uleep poia. *

¹⁰ Pa ighe loloon ighur ila, ene aat Krisi igham ghiit taduduun ila Maaron maata. Ve isaav ighe tauun avoon tavotia ghuruun ila toit ila eval tiina matazi, ene aat Maaron igham mulin ghiit ve taleep poi.

¹¹ Pasaa, Maaron aliina tau tiboode na isaav ighe:

“Tamtamon tisov tau tighur ila tooni, ene pale tighita ghuruun ila toozi anoonja ve Maaron igham mulin zi. Eta irau ighur maata pani sorok ne mako.” *

¹² Saveen tane inarui tamtamon tisov. Yes Yuda, ve yes tau Yuda mako na paam. Pasaa, Maaron eemon ilepleep. I Tiina to iit tasov. Ve i ighurghur poia tooni tiina izazaa to tamtamon tisov tau tighasoni pa uleen. *

¹³ Pasaa, Maaron aliina isaav ighe:

“Tamtamon tisov tau tighason Maaron pa uleen na, i aat igham mulin zi ve tileep poi.” *

Yes Israela lezi puughu eta to tizor Krisi mako

¹⁴ Eemon isaav ighe tamtamon tighur ila to Maaron mako, ene pale tighasoni pa uleen mindai? Ve isaav ighe tiloon vaaru mako, pale tighur ila tooni mindai? Ve isaav ighe lezi

* **10:9:** Mt 10:32; Yo 3:15; Mbanj 16:31 * **10:11:** Is 28:16; Ro 9:33

* **10:12:** Mbanj 10:34+; Ro 3:22, 29; Ga 3:28 * **10:13:** Yoel 2:32; Mbanj 2:21

tamtamon eta to ivotia mos pazi mako, ene pale tiloon Maaron vaaru mindai? *

¹⁵ Ve isaav ighe timbaan yes uraata tila mako, pale tivotia mos pa tamtamon mindai? Pasaa, Maaron aliinja tau tiboode na, isaav ighe:

“Tamtamon tighita yes tau tilaghovai vaaru poia ilam na, le igham zi lolozi poia.” *

¹⁶ Eemon yes Israela tisov titaghon saveen to vaaru poia mako. Enjaenja mon. Saveenja, Isaia isavia muun wa. Ighe:

“Tiina, sei ighur ila saveen tau yei nivotia pazi ne?” *

¹⁷ Tauvene Maaron aliinja ta talonloonja, tauta ipaburigin ghiit to taghur ila. Ve saawe tau tivotia Krisi vaaru, tamtamon tiloon saveen tooni.

¹⁸ Ighe tauvene, pale tasaav mindai pa yes Israela? Tiloon vaaru poia soone? Mako. Yes tiloonja wa. Pasaa, Maaron aliinja isaav ighe:

“Alijazi ila irau taan isov,
ve saveen toozi ilaan irau nughmarin.” *

¹⁹ Ma mindai? Yes Israela tiloon saveen tawe, ve tikankaan pa puughu? Mako. Yes irau tighazon pan. Aghita. Muun, Mose isaav ighe:

“Yes nugh nugh tau lezi ezazi mako ve lezi ngar mako na, yau aat naghama zi timin leg.
Ve poia tsiau tau iza toozi, ene pale igham gham atemim yavyav, ve anoon pazi.” *

²⁰ Ve propet Isaia isaav ghazonja kat ighe:

* **10:14:** Mban 8:30+

53:1; Yo 12:38; Hib 4:2
Ro 11:11, 14

* **10:15:** Is 52:7; Ep 6:15

* **10:18:** Mbo 19:4

* **10:16:** Is

* **10:19:** Lo 32:21;

“Tamtamon tau tizuari zi payau mako na, yes tana ta tindeen ghau.

Ve yes tau tighason payau mako, tauta natotoi taug pazi.” *

²¹ Eemon yes Israela, Isaia isavia saveen injarui zi ighe:

“Yam tau taliŋamim puura mako ve azoroor aliŋag na, saawe isov yau nararaav nimag ve nasasaŋan gham to amuul alam payau. Eemon mako.” *

11

Maaron irau ighur muuri pa yes Israela mako

¹ Ighe tauvene, pale tasaav mindai? Maaron ighur muuri pa tamtamon tooni? Mako kat! Aghita. Yau tamtamon to Israel. Yau paaghu to Abaram, ve puughu tsiau ivot ila to Benyamin. *

² Maaron irau ighur muuri pa yes Israela mako. Pasaa, i tauu isiigh zi timin le wa. Matamim inŋal imuul ila pa sinain to propet Ilia. Maaron aliinŋa tau tibooode na isaav tauvene: Ilia ivotia sosor to yes Israela ila to Maaron, ve itan raraini ighe:

³ “O Tiina, yes tiravuur propet tsio tisov timatmaat wa.

Ve artaal tau tigharaat zi payo na, tauvene paam. Tirewaar zi tisov timbiriis.

Tauvene aazne, yau zigau kat ta naleep. Ve tizuari zi pa ravuun ghau paam.” *

⁴ Ve Maaron iyol Ilia aliinŋa ighe:

* **10:20:** Is 65:1; Ro 9:30 * **10:21:** Is 65:2 * **11:1:** Mbo 94:14;
2Kor 11:22; Pil 3:5 * **11:3:** 1King 19:10+

“Mako. Aazne, yau leg tamtamon irau 7,000 tau nakis zi gha tiyozyoos ariaañ. Tauta tiput aghezi pa maaron karom Baal mako.”
*

⁵ Aazne, ngar raraate ivot muul. Maaron isiigh yes Israela siriv timin le itaghon i tauu loolo ve poia tooni. Tauta tighur ila to Krisi. *

⁶ Zeran tawe, Maaron igham zi timin le itaghon uraat ve ngar popoia tau tighamgham zi ne mako. I itaghon tauu loolo ve poia tooni, ve igham zi. Ve imin ta i igham zi timin le itaghon uraat ve ngar toozi popoia, kanan poia tooni tawe, imin poia tauu mako. *

⁷ Ighe tauvene, pale tasaav mindai? Gabua tau yes Israela tizuari zi pani na, eval tiina tighamu mako. Tamtamon toozi enjaenja ta Maaron tauu isiigh zi timin le na, yes mon ta tighamu. Ve yes siriv, i ipul zi titaghon tauzi ngar toozi. Tauta ngar toozi iyaryaan kat tige tizoor saveen tooni. *

⁸ Saveenja tibooode pataghaan tauvene:

“Maaron igham zi lolozi iveghai tauzi imin tamtamon tau igheen le loolo iveegh kat.

Tauta matazi tighita gabua, eemon tighilaal puughu mako. Ve talinjazi tilonloon saveen, eemon titaghoni mako.

Ve ngar toozi tawe isov soone. Iseenja iseenja gha ilam aazne.” *

⁹ David paam isavia saveen injarui zi ighe:

* **11:4:** 1King 19:18 * **11:5:** Ro 9:27 * **11:6:** Ro 4:4, 9:15+;
Ep 2:8 * **11:7:** Ro 9:31; 2Kor 3:14 * **11:8:** Lo 29:4; Is 29:10;
Yo 12:40; Mbanj 28:26+

“Boor tau aniin toozi igheen izala na, aat imin liis pazi, ve imin maet tau titut aghezi ila ve titap. Leso iyat sosor toozi. * *

¹⁰ Matazi aat ikumkuum, ve tighilaal mako. Ve yes pale tibaad patanani tiina le ndumezi ikook, ve tileep tauvene le alok.”

Yes Israela tizor Kriisi, tauta ighur sooso pa vaaru poia ila irau nugh nugh

¹¹ Yes Israela tau tighur ila to Kriisi mako na, timin tamtamon tau itut aaghe ila maet, ve itap. Ve mindai, pale tileep tauvene taghon taghon gha ila? Mako. Pale tiburig muul. Onoon, aazne tisor pa eez to Maaron. Eemon ngar tau tighamu na, ene imin eez pa Maaron to igham mulin nugh nugh tau Yuda mako na. Leso yes Israela tighita ngar poia tau i igham pazi na, ve lolozi ighaar pani kat, ve timuul tila pani. *

¹² Saawe tau yes Israela tisor pa eez to Maaron ve tighur murizi pani, ene imin eez to poia tiina to Maaron izaa to eval tiina to taan. Pasaa, saawe tana, poia tooni inarui eval tiina tau Yuda mako na. Ve ighe tauvene, iit tawatagh: Isaav ighe yes Israela tisor titor ngar toozi imuul ila pa Maaron, ene pale poia tooni tiina kat izaa to tamtamon

* **11:9:** Zeran ngara siriv tighe saveen to boor, ene izaa to tutuun tau Maaron igham pa yes Israela. Tutuun tawe, ene gabua poia. Eemon yes Israela tigham ngar tiina kat pani. Tauta ikau ngar toozi gha tighilaal Yesu mako. * **11:9:** Mbo 69:22+ * **11:11:** Mban 13:46; Ro 10:19

tisov le iliiv poia tooni tau muun iza toozi na. †
*

13 Aiyo, yau naghe nasavia saveen siriv inarui yam tau Yuda mako na. Pasaa, Maaron imbaan ghau to naghham uratoi gham. Ve yau naghita naghe uraat tsiau tane, ene uraat tiina, ve uraat tauu. Tauvene naghe naghhamu kat, leso ighur anoonja popoia ivot. *

14 Pa ighe uraat tsiau ighur anoonja popoia siriv tivot ila sosomim, ene pale zetagna Israela tighita ve lolozi pani, ve tamtamon toozi siriv pale titoor ngar toozi ila pa Maaron, ve igham mulin zi. *

15 Aghita. Saawe tau yes Israela tizoor Maaron ngar tooni, ve i ighur muuri pazi, ene imin eez to eval tiina to taan yesja Maaron tivalupu zi timin eemon. Tauvene murei, isaav ighe Maaron igham mulin yes Israela paam ve yesja tivalupu zi muul timin eemon, ene imin burigiinj to yes mateegha. ‡

16 Saawe tau tigharaat mberet, ighe tipamuun Maaron pa sirivu imin maata, ene aat mberet isov tana imin Maaron le. Ve ai oliv tauvene paam. Isaav ighe waria imin Maaron le, ene aat booga

† **11:12:** Saawe tau yes Yuda tizoorugh tigde tirav Yesu izala ai pambaroon na, tisor pa eez to Maaron. Eemon iit tawatagh: Mateegh tooni, ta imin eez pait to Maaron ireu sosor toit ve igham mulin ghiit. Ve saawe tau Yuda tighur patajani pa mbanjoona to Kisi, yes tipul Yerusalem, ve tighau tila pa nugh siriv. Gabua tana imin eez pa yes tau Yuda mako na gha tiloon vaaru poia. * **11:12:** Ro 11:25 * **11:13:** Mban 9:15 * **11:14:** Ro 10:19 ‡ **11:15:** Eez ite to tator saveen ziiri tane, ene vene: “ene iit tawatagh: Saawe to Maaron ipaburigin yes mateegha, ene ilam igharau wa.”

paam tisov timin Maaron le. § *

Mataan veleghin yes Israela sov. Pa iit paam, Maaron irau ighurghur ghiit mako

¹⁷ Yes Israela timin ai oliv pazoogh. Ve yam tau Yuda mako na, amin oliv sagsag bogazi. Aazne, ene imin Maaron isoop oliv pazoogh tana booga siriv tizi, ve ighur gham ala apaak ila niazi. Tauta aazne, atum tomania oliv pazoogh tana booga siriv, ve yamŋa aghamgham taan ŋgoreenja ila waria. *

¹⁸ Eemon apakur taumim sorok aghe: “Yei popoia-mai ve niliiv oliv booga siriv tau Maaron isoop zi tizi na.” Agham ŋgar tauvene sov. Matamim iŋgal. Yam ai booga mon. Ai waria ighamgham tapiri ilat tsiam mako. Yam aghamgham tapirimim ila ai waria.

¹⁹ Ve yam siriv pale aburig ve asaav aghe: “Oliv booga tawe, Maaron isoop zi tizi, leso yei nila nigham niazi.” ²⁰ Saveen tsiam tana, ene iduduun. Eemon Maaron isoop zi sorok mako. I isoop zi tizi pasaa, yes tighur ila tooni mako. Ve aazne, yam agham niazi pasaa, ayooz ariaan ve akis ghuruun ila tsiam. Eemon apakur taumim sov. Yam aat aroi. *

§ **11:16:** Mberet sirivu tau tipamuun Maaron pani, ene izaa to yes Israela eŋaenja tau tighur ila to Yesu imin maata. Ve ai oliv waria, ene izaa to yes Israela timbuzŋa Abaram, Isak, ve Yakop tau Maaron imbu saveen tomani zi na. Gabua ru tawe tigham Maaron loolo isaghav yes Israela. Tauta i irau ighur muuri pazi kat mako.

* **11:16:** Nam 15:17+ * **11:17:** Yer 11:16; Yo 15:2+; Ep 2:11+

* **11:20:** Is 66:2, 5; 1Kor 10:12; Pil 2:12; 1Pe 1:17

²¹ Pa ighe Maaron ighurghur oliv tauu booga mako, ene aat yam paam, i irau ighurghur gham mako.

²² Tauvene matamim ingal poi. Onoon, Maaron i poia puughu. Eemon i irau ileel ghiit mako. Yes Israela tau tighur murizi pani ve titap na, i ileleel zi mako. Ve yam, i igham poghani gham. Eemon yam aat akis poia tooni ariaan, ve aleep ilonj ila. Ighe mako, i aat isoop gham azi paam. *

²³ Ve murei, isaav ighe yes Israela titoor ngar toozi, ve tighur ila to Kriisi, ene aat Maaron ipaak zi tila niazi muul. Pasaa, i tapiri irau to igham tauvene.

²⁴ Aghita. Yam tau Yuda mako na, amin oliv sagsag. Yam avot ila oliv pazoogh mako. Eemon Maaron igham uratoi gham, tauta aazne apaak ila oliv pazoogh tana gha amin booga. Isaav ighe Maaron igham tauvene payam, onoon kat, oliv pazoogh bogazi tau i isoop zi tizi na, i aat ipaak mulin zi tila niazi.

Murei, yes Israela pale tighur ila to Kriisi

²⁵ Yam tonvetaz, yau naghe navotia gabua yongaana ee payam. Leso apakur gham sorok sov. Onoon, aazne Maaron ipul yes Israela siriv titaghon tauzi ngar toozi. Tauta ngar toozi iyaryaan kat tighe tizoor saveen tooni. Eemon i irau ipul zi tileep tauvene le alok ne mako. Pale tilepleep tauvene le i iyau nugh nugh tamtamonazi tau i isiigh zi pataghaan na tisov timin le, *

²⁶ mako igham mulin yes Israela tisov paam. Saveenja tiboode pataghaan wa:

* **11:22:** 1Kor 15:2; Hib 3:14 * **11:25:** Lu 21:24; Yo 10:16; Syg 7:9

“Uleenja pale ileep loloz Zion ve ilam.
 Ve i pale igham Yakop paaghu tooni tipul ngar
 toozi saghati ileple, ve matazi ingal Maaron
 muul.” *

²⁷ Ve yau aat naghur lezi eez paaghu to nareu
 sosor toozi, leso yenza nivalupu ghei muul
 nimin eemon.” *

²⁸ Aazne, yes Israela tau tighur ila vaaru poia
 mako na, koi isap yesja Maaron sosozi. Ve ene
 imin eez to poia to Maaron iza to nugh nugh tau
 Yuda mako na. Eemon Maaron loolo ighengheen
 to yes Israela soone. Pasaa, timbuzja Abaram,
 Isak, ve Yakop, ta ndamozi pazi. Ve gabua ite
 paam, i tauu isiigh zi timin i le wa. *

²⁹ Isaav igha Maaron ipoi tamtamon eta imin le,
 ve igham gabua poia eta pani, ene i irau itoor ngar
 tooni muul mako. Tauvene irau ighur muuri pa
 tamtamon tana, ve igham mulin gabua tawe ne
 mako. *

³⁰ Aghita. Muun, yam tau Yuda mako na, azor-
 zoor Maaron ngar tooni. Ve aazne, yes Yuda anazi
 tighamgham tauvene. Eemon ngar tau tighamu
 na, tauta imin eez payam, gha Maaron loolo is-
 aghatin gham, ve ireu sosor tsiam.

³¹ Tauvene aazne, yes Israela tizoroor Maaron
 ngar tooni. Eemon murei, poia tooni tau i loolo
 isaghatin yam tau Yuda mako na, ve ireu sosor
 tsiam, ene pale ipaburigin ngar toozi. Leso yes
 paam titoor ngar toozi, ve Maaron loolo isaghatin
 zi, ve ireu sosor toozi. ³² Pasaa, Maaron ipul ngar

* **11:26:** Mbo 14:7; Is 59:20 * **11:27:** Is 27:9; Yer 31:33+; Hib
 8:8+ * **11:28:** Lo 7:8, 10:15; Ro 9:5 * **11:29:** Nam 23:19

to zoraan saveen ikau iit tasov. Leso iit tasov leen eez eemon to tala tooni. Ene poia tooni tau i loolo isaghatin ghiit ve ireu sosor toit. Eez ite paam mako. *

Tapait Maaron pa ngar tooni

³³ Onoon kat, Maaron, i ngar puughu. Ngar tooni, ene ila le ila kat, imin mazavan belbeluunja. Pasaa, i iwataghiir gabua naol isov. Sei irau iwatagh katin ngar tooni ve eez tau i itaghoni ne? Ighe tatoova to tagham ngar pani, ene pale ngar toit imbool. *

³⁴ “Pasaa, sei iwatagh Neer Tiina ngar tooni?

Ve sei irau iuule pa ngar? *

³⁵ Ve sei igham Maaron le gabua, leso murei iyol mulini? Mako.” *

³⁶ Pasaa, i tauu ta imin gabua naol isov puughu. Ve gabua naol isov tiyaryaan ila tooni, ve tileep leso tipaghazonai i eeza. Tauvene iit aat tapaiti irau saawe. Onoon. *

12

Tapul tauun tamin Maaron le

¹ Tauvene yam tonvetaz, aghita. Maaron loolo isaghatin ghiit ve igham mulin ghiit wa. Puughu tane ta naghe napariaan gham to aghur anonjamim ila pa Maaron imin watoonrau maata yaryaare. Watoonrau tauvene, ene patabuyaan ila i maata,

* **11:32:** Ro 3:9; Ga 3:22

* **11:33:** Yop 11:7+; Mbo 92:5

* **11:34:** Is 40:13; 1Kor 2:16

* **11:35:** Yop 35:7, 41:11

* **11:36:**

1Kor 8:6; Kol 1:16; Hib 2:10; Syg 4:11

ve ighamu loolo poia kat. Ighe tabees pa Maaron itaghon eez tauvene, ene iduduun. *

² Yes tau titaghon taan ngara na, yam apaak zi pa ngar toozi muul sov. Apul Maaron itoor ngar tsiam ve gabuamim imin paaghu kat. Leso aghilaal ngar tau Maaron loolo pani na. Ene ngar tau poia kat, ve iduduun mon, ve ighamu loolo poia. *

Tagabiiz poghania tauun, ve iit enjaenja tagham uraat tau Maaron ighuru ila nimaan na

³ Maaron ighur ghau namin uraata tooni itaghon tauu loolo ve poia tooni. Tauvene yau naghe napariaan gham asov tauvene: Agham ngar sorok aghe yam popoiamim aliiv zeetmimja sov. Yam aat agabiiz poghania taumim: Maaron igham gham aghur ila ariaan ve ataghon katin ghuruun ila tsiam ngara, ma mako? *

⁴ Iit tamtamon anonaan siriv siriv katini: Agheen, nimaan, avoon, mataan, ve gabua siriv paam. Ve anonaan siriv siriv tana, lezi uraat ite. *

⁵ Iit tau tapaak Krisi ne, tauvene paam. Iit tamin Krisi niima, aaghe, ve anonaan siriv siriv paam tau tilup zi timin eemon. *

⁶ Maaron irei uraat ve tapiri maata maata le irau ghiit, itaghon tauu loolo ve poia tooni. Tauvene iit aat tagham uraat toit toit. Isaav ighe Maaron ighur neer eta imin propet, neer tana aat ivotia

* **12:1:** Yo 4:24; Ro 6:13; 1Pe 2:5

2:15+ * **12:3:** 2Kor 13:5; Pil 2:3

* **12:5:** 1Kor 12:12-27; Ep 4:4, 25

* **12:2:** Ep 4:23, 5:17; 1Yo

* **12:4:** 1Kor 12:12+; Ep 4:16

Maaron aliinja pa tamtamon itaghon ghuruunj ila tooni. * *

⁷ Isaav ighe Maaron igham neer eta le ngar pa uraat to uleenj tamtamon, i aat itaghon dudunai ngar to uleenj. Ve isaav ighe eta le uraat to ipaduduunj tamtamon pa Maaron aliinja, i aat ipaduduunj zi kat. ⁸ Ve isaav ighe eta le ngar pa uraat to palotiinj tamtamon, i aat ipalot zi. Ve ighe eta le uraat to reinj gabua pa yes mbolaanja, i aat iuul zi kat, ve irei gabua tooni toman loolo poia. Isaav ighe eta le ngar pa nginiinj uraat, i aat maata iza pa uraat tooni, ve ighamu kat. Ve ighe eta le ngar pa uraat to uleenj yes tau patanjani igham zi na, i aat iuul zi toman loolo poia. *

Tutuunj siriv tau injarui tamtamon to Krisi

⁹ Isaav ighe yam aghur lolomim pa tamtamon, na agham karom sov. Aghur lolomim pazi kat, ve atotoi anoonja ivot. Yam aat aghur koi pa ngar saghati ve aleep soghan pani. Ve ngar poia, o akisi tunja. *

¹⁰ Yam amin tonvetaz to Krisi wa. Tauvene lolomim pa taumim kat ve avaghamu poghani gham. Agham ngar pa taumim ezamim sov. Apait zeetmimnja pa ngar popoia tau yes tighamghamu na. *

* **12:6:** Eez ite to tatoor saveenj ziiri tane, ene vene: “neer tana aat ivotia Maaron aliinja pa tamtamon itaghon saveenj tau iit taghur ila na.” * **12:6:** 1Kor 12:4+; Ep 4:11+; 1Pe 4:10+ * **12:8:** 2Kor 9:6-13; 1Pe 5:2 * **12:9:** 2Kor 6:6; 1Tes 5:21+; 1Pe 1:22 * **12:10:** Ga 5:26; Pil 2:3; Hib 13:1

¹¹ Besoon tau agham pa Neer Tiina, na arogroog matamim sov. Apul Avuvu Patabuyaaj ipaburi- gin gham, leso matamim izaa pa uraat tsiam, ve aghamu toman lolomim. *

¹² Yam awatagh: Murei, Maaron pale igham mulin ghiit ve taleep poia. Matamim ingal gabua tane ve aghur matamim pani irau saawe. Leso igham gham lolomim poia. Ve ayooz ariaaj pa badoon patanjani, ve asuj irau saawe. Apul sunjuuj sov. *

¹³ Isaav igha mbolaaj igham Maaron tamtamoni tooni, na auul zi. Ve isaav igha loomba tilat, na agham zi toman lolomim poia, ve anjin poghani zi. *

¹⁴ Isaav igha tamtamoni tighur patanjani payam pasaa, ataghon Krisi, na yam aghur saghati izaa toozi sov. Asuj Maaron to igham poghani zi. *

¹⁵ Yes tau tintinisi na, yam ala tintinmim tomani zi. Ve yes tau lezi patanjani ve titanj na, yam ala atanj tomani zi. ¹⁶ Yam asov alup lolomim ve ngar tsiam imin eemon. Apakur taumim, ve apaak yes tau ezazi tintiina mon na sov. Yam aat alup gham tomania yes tau lezi ezazi mako na. Ve apaat taumim pa ngar tsiam sov. † *

¹⁷ Isaav igha tamtamoni tigham ngar saghati payam, na ayatu pa ngar saghati sov. Atoova

* **12:11:** 1Tes 5:19 * **12:12:** Ro 5:2, 15:13; Kol 4:2; 1Tes 5:16+;

Yems 1:4 * **12:13:** 2Kor 8:7; Hib 13:2; 1Pe 4:9 * **12:14:** Mt

5:44+; 1Kor 4:12; 1Pe 3:9 † **12:16:** Eez ite to tatoor saveej ziiri tane, ene vene: Azuari gham pa uraat tintiina to agham ezamim pani na sov. Uraat tau tamtamoni tighita tigha uraat sorok na, yam irau aghamu toman lolomim poia.” * **12:16:** Mbo 131:1+; Ro

15:5+; 2Kor 13:11; Pil 2:2

to ataghon ngar tau iduduun mon ila eval tiina matazi. *

¹⁸ Ve atoova to alup gham tomania tamtamon tisov amin eemon. Tauvene saa ngar tau yam irau aghamu to ilup gham na, aghamu. *

¹⁹ Yam zeran tsiau, lolog igheen tsiam kat. Nayol saveen tsiau muul. Ngar saghati tau tamtamon tigham payam na, ayatu sov. Apuli ila Maaron niima. I tauu pale ighur patanani inarui zi. Pasaa, Maaron aliina tau tiboode na, isaav ighe:

“Yau leg uraat to naghur atuya pa ngar saghati. Taug pale nayatu.” *

²⁰ Tauvene ayat ngar saghati sov. Agham poghania koiamimja. Pa Maaron aliina ziiri ite isaav tauvene:

“Isaav ighe koiam eta pitoola, ugham le aniin. Ve ighe murunu, ugham le yaa.

Leso ughamu ighilaal sosor tooni, ve maaya.”

*

²¹ Tauvene apul ngar saghati itatan gham sov. Yam aat atatan ngar saghati pa ngar poia.

13

Taleep ila yes pooza to taan sambazi

¹ Tamtamon tisov aat tileep ila yes pooza to taan tau tinginngin ghiit ne sambazi. Pa pooza eta to taan iyooz sorok mako. Maaron tauu ighur uraat tawe ila nimazi. *

* **12:17:** Mt 5:39; 2Kor 8:21; 1Tes 5:15 * **12:18:** Mt 5:9; Ro 14:19; Hib 12:14 * **12:19:** Lo 32:35; Mbo 94:1; Hib 10:30 * **12:20:** Igham 23:4+; Lp 25:21+; Mt 5:44 * **13:1:** Yo 19:11; Tit 3:1; 1Pe 2:13+

² Tauvene isaav ighe tamtamon eta izoor yes pooza to taan, ene i izoor Maaron. Pasaa, Maaron ta ighur zi pa uraat toozi. Tauvene isaav ighe tamtamon eta izoor zi, i aat igham atuya pa ngar tooni tana. ³ Laak, savunugha ta tiroiroi pa yes pooza to taan? Yes tau tighamgham ngar poia? Mako. Yes tau tighamgham ngar sasaghati, ta tiroiroi pazi. Tauvene isaav ighe yo lolom pa yes pooza to taan tighur patanani payo mako, na ugham ngar poia mon. Leso uroi sov, ve yes pooza tipait ghom. ⁴ Pasaa, pooza to taan, ene yes besoonja to Maaron. Yes tileep to tiuul ghom, leso uleep poi. Eemon isaav ighe yo ughamgham ngar saghati, na uyamaan ghom. Pa yes tikis mbuzaagh sorok mako. Yes ezazi pa ghuruun atuya pa tamtamon tau tighamgham ngar saghati na, leso titotoi aatyavyav to Maaron pazi. Ve yes irau tileleel ghom mako. ⁵ Tauvene iit tasov aat taleep ila yes pooza sambazi, ve taloon alinazi. Pa ighe tazoor zi, ene pale Maaron aate yavyav pait, ve yes tigham i naagho ve tighur atuya pait. Ve gabua ite. Isaav ighe tazoor zi, ene pale tauun tayamaan ila loloon taghe iit tagham sosor ila Maaron maata.

⁶ Puughu tane ta yam aat asik takes paam. Pa yes pooza, ene yes besoonja to Maaron. Saawe isov, yes timamaat pa uraat tau Maaron ighuru ila nimazi na. ⁷ Tauvene saa gabua tau yam aat agham pa yes pooza, na aghamu. Ighe tipoi gham pa takes ma saa gabua, na agham pazi. Ve yes tau lezi ezazi, na yam atandagh pazi ve apakur zi. Pa ighe agham pazi tauvene, ene iduduun. *

* 13:7: Mt 22:21

Taghur loloon pa tamtamon tisov ve tagham poghani zi

⁸ Isaav ighe agham bun, na apuli igheen malau sov. Rekia ve ayatu. Eemon iit tasov leen bun tiina ee ighengheen. Tayatu, aat tarao mako. Bun toit, ene vene: Iit aat loloon pa tamtamon tisov ve tagham poghani zi. Pa ñeer tau ighe loolo pa tamtamon ve igham poghani zi, ene i itotoi tutuun anoonja ivot. *

⁹ Pasaa, tutuun ta naol ne imin “Ughur boog sov,” “Urav tamtamon imaat sov,” “Uum sov,” “Lolom ighaar pa zetamja gabua toozi sov,” ve tutuun siriv paam, ene tisov tighenaar ila tutuun eemon tane loolo: “Lolom pa tamtamon ve ugham poghani zi, imin lolom pa taum.” *

¹⁰ Ighe loloon pa tamtamon, ene iit irau tagham sosor eta pazi mako. Tauta isaav ighe iit loloon pa tamtamon ve tagham poghani zi, ene aat tagham ñgar to tutuun anoonja ivot. *

Saawe ilam igharau wa

¹¹ Tauvene yam aat ataghon ñgar tane. Pasaa, yam aghilaal saawe tane wa. Tauvene agheen irao. Aburig! Pa saawe to Maaron igham mulin ghiit, ene ilam igharau wa. Saawe tau iit taghur ila imin maata na, saawe tana ighengheen malau soone. Eemon aazne, ilam igharau wa. *

¹² Aghita. Mbonj ighe isov, ve nughizau tane. Tauvene tapul ñgar to ndoroom isov ileple, ve

* **13:8:** Mt 22:37-40; Ga 5:14 * **13:9:** Igham 20:13+; Wkp 19:18

* **13:10:** 1Kor 13:4+; Ga 5:6; Yems 2:8 * **13:11:** 1Kor 7:29+; Ep 5:14; 1Tes 5:6+

tanonogh ghiit pa ngar to ghazonja imin zaaba tigharaat zi pa yauyaun to malmal. *

¹³ Iit aat tataghon ngar to ghazonja imin tamtamon tau tilaagh pa mataaz. Ve ngar to talup ghiit pa ghunuun ve ghamuun ngar sasaghati naol, ngar to ghuruun boog, ngar to mataan saghati imin ngavuun, ngar to parzoraan, ve ngar to nujuuan tomania ngar sasaghati siriv paam, ene tagham zi muul sov. *

¹⁴ Yam aat agham ngar to Tiina toit Yesu Krisi imin lemim nonoghiina. Ve ngar sasaghati tau lolomim mungaana ipapazaagh gham pani na, ail eez pa taghoniin sov. *

14

Isaav ighe zetaanja siriv titaghon eez ite pa ghuruun ila toozi, ene tayau avoon pazi sov

¹ Isaav ighe tamtamon eta ghuruun ila tooni iyaryaan geeg mako, ve ighe ilat tomani gham pa sunuun, na ayok pani, ve aghamu toman lolomim poia. Ayau avomim pani pa ngar tooni siriv tau ite rig pa ngar tsiam na sov. *

² Tamtamon siriv tighur ila tighe yes irau tighan gabua naol isov. Ve tamtamon siriv, ghuruun ila toozi iyaryaan geeg mako, ve tigham ngar tighe: Isaav ighe tighan gabua mizazi, ene pale igham zi

* **13:12:** Ep 5:11, 6:11+ * **13:13:** Lu 21:34; Ga 5:19+; Ep 5:18;

1Pe 4:3; 1Yo 1:7 * **13:14:** Ga 3:27; Ep 4:24; Kol 3:10; 1Pe 2:11

* **14:1:** Ro 15:1; 1Kor 8:9, 9:22

tingalaan ila Maaron maata mako. Tauta tighanghan aniiñ ve sain mon. *

³ Yes tau irau tighan gabua naol isov na, tivelegh zetazña tau tiroi pa ghaniin gabua siriv na sov. Ve yes tau tiroi pa ghaniin gabua siriv na paam. Tighita zetazña tau tighan gabua naol isov na, ve tigde yes tisor sov. Pa yes paam, Maaron igham zi timin i le. *

⁴ Ve yo sei ta ughe ugabiiz Neer Tiina besoonja tooni pa ngar tau tighamghamu na? Maaron tauu pale igabiiz zi. Isaav ighe ighit zi ighe tiduduun, ma tisor, ene i kaut tooni. Eemon i aat ighit zi ighe tiduduun. Pasaa, i irau ipalot zi, leso tiyooz ariaan ve titaghon ngar tooni. *

⁵ Ve tamtamon siriv, yes tighita tigde saawe ee to sunuun, ene patabuyaan iliiv saawe siriv. Ve tamtamon siriv tighita tigde saawe ta naol ne, ene raratezi mon ila Maaron maata. Ene poia. Tamtamon enaenja irau tigham ngar poi pa gabua tane, ve saa ngar tau tighita tigde ene iduduun, o titaghoni.

⁶ Yes tau tipatab pa saawe eta na, tighamgham tauvene to tipakur Neer Tiina. Ve yes tau tighanghan gabua naol isov na, yes paam tipakur Neer Tiina. Pasaa, saawe tau tighan, yes lolozi poia pani, ve tipaiti pa gabua tau i igham pazi na. Ve yes tau tighanghan gabua siriv mako na, yes paam

* **14:2:** Saawe siriv, yes tau Yuda mako na, tirav sipsip ma makau imin watoonrau pa maaron karomnja toozi, ve timoz sirivu ila rumei toozi loolo, ve tigham sirivu ila nugh to raukoliin, leso tamtamon tigholi. Ve eez toozi to ravuun gabua, ene ite pa eez to yes Yuda. Yes tau tiroi pa ghaniin gabua mizazi na, tiroi pa ghaniin gabua tauvene. * **14:3:** Kol 2:16 * **14:4:** Mt 7:1; Yems 4:11+

matazi ingal Maaron. Tauta tighamgham tauvene, ve tipapaiti pa poia tooni toman lolozì poia. *

⁷ Pasaa, lepoghaan, ene gabua to iit tauun mako. Ve mateegh toìt paam, ene gabua to iit tauun mako. *

⁸ Isaav ighe taleep, ene taleep to tabees pa Njeer Tiina, ve tapait eeza. Ve isaav ighe tamaat, ene taleep ila i niima. Tauvene isaav ighe taleep, ma tamaat, ene iit tooni mon. *

⁹ Pasaa, Krisi imaat ve iburig muul, leso imin tiina pa tamtamon tisov. Yes mateegha, ve yes tau tileep matazi yaryaare na paam. *

¹⁰ Tauvene puughu mindai ta yo ughe ugabiiz tonvetaz tsio to Krisi, ve matam veleghin zi? Yo uwatagh mako? Murei, iit tasov pale tayooz ila Maaron naagho. Leso igabiiz ghiit, ve ighur atuya pait. *

¹¹ Saveenja tiboode pataghaan wa tauvene:

“Yau Maaron tau naleep le alok. Ve avog iyaryaan naghe:

Tamtamon tisov aat tiput aghezi payau ve tipait ghau,

ve tisaav ghazonja tigde yau Maaron tauu.” *

¹² Tauvene iit enaenja tasov pale tayooz ila Maaron naagho, ve tavotia ngar tau taghamu izi taan na ila tooni. *

Tagham zetaanja titap pa ghuruun ila toozi sov

* **14:6:** 1Kor 10:30+; 1Tim 4:3+ * **14:7:** 2Kor 5:15; Ga 2:20; 1Pe

4:2 * **14:8:** Pil 1:20; 1Tes 5:10 * **14:9:** Mt 28:18+; Mbanj 2:36

* **14:10:** Mt 25:31+; Mbanj 17:31 * **14:11:** Is 45:23; Pil 2:10+

* **14:12:** Mt 12:36; 2Kor 5:10; 1Pe 4:5

¹³ Tauvene iit tagabiiz zetaann̄a ve tavelegh zi muul sov. Ve tagham ngar eta to tagham yes ton̄vetaz to Krisi titap pa ghuruun̄ ila toozi, ma tapoon eez pazi pa Krisi sov. *

¹⁴ Pasaa, Tiina toit Yesu ipaghazon̄ai ngar tsiau le nawatagh kat tauvene: Gabua naol isov tau taghanghan zi na, tisov tingalaan̄ ila Maaron maata. Eta saghati mako. Eemon isaav ighe tamtamon eta igham ngar ighe gabua eta ingalaan̄ ila Maaron maata mako, na iyamaan ghi. Pa ighe ighan gabua tana, ene i igham sosor. *

¹⁵ Tauvene isaav yo ughan gabua eta ila ton̄vetaz tsio maata, le ureu loolo, ene yo utaghon ngar to loloon pa tamtamon mako. Gabua tauvene, ughani sov. Pale uvaghamunia ton̄vetaz tsio tau Krisi imaat pani na. *

¹⁶ Tauvene isaav ighe yam agham ngar aghe gabua naol isov, ene popoia pa ghaniin̄, ene poia. Eemon ayamaan gham. Pa aat aghan gabua tau zeetmim̄na siriv tirere pani na, mako tiyau avozi payam. ¹⁷ Isaav ighe tataghon pooz to Maaron, ene aat tagham ngar tiina pa saa gabua tau poia pa ghaniin̄ ma ghunuun̄ ne mako. Pasaa, pooz to Maaron ngara, ene vene: Tataghon ngar duduun̄a, itin̄a tavalupu ghiit tamin eemon, ve Avuvu Patabuyaan̄ igham ghiit taleep toman loloon poia kat ve loloon luuma. *

¹⁸ Tamtamon tau ighe ibees pa Krisi itaghon eez tauvene, ene aat Maaron loolo poia pani, ve tam-

* **14:13:** Mt 18:6+; 1Kor 8:9, 10:32 * **14:14:** Mk 7:14+; Mban̄ 10:15; Tit 1:15 * **14:15:** 1Kor 8:11, 10:24+ * **14:17:** Ro 15:13; Ga 5:22+

tamon paam tiyok pani tighe ngar tooni poia. *

¹⁹ Iit aat tazuari ghiit pa ghamuun ngar tau igham tamtamon tisov tileep poi toman lolozi luuma, ve tavapaloti ghiit pa ngar popoia siriv. *

²⁰ Tauvene yam avazorai gham pa gabua to ghaniin sov. Pa aat avaghamunia uraat to Maaron. Onoon, gabua naol isov tingalaan ila Maaron maata, ve poia to taghan zi. Eemon isaav ighe tamtamon eta ighan gabua eta, ve igham iitete itap pa ghuruun ila tooni, ene i igham ngar saghati. *

²¹ Tauvene isaav ighe yo matam ingal ughe ughan gabua miiza, ma ughun vaen, ma ugham ngar ite paam tau irau igham tonvetaz tsio eta itap pa ghuruun ila tooni, na poia to upul ngar tana.

²² Gabua tauvene, isaav ighe yo ughur ila ughe poia, ma saghati, ene kaut to yamru Maaron. Isaav ighe tamtamon eta iyamaan ila loolo ighe ngar tau i itaghoni na, Maaron le saveen pani mako, ene pale tintini. *

²³ Eemon isaav ighe tamtamon eta loolo ruru pa gabua eta ve ighani, ene i igham sosor. Pasaa, i ighur ila ve igham ngar tana mako. Ve saa ngar tau iit taghamu itaghon ghuruun ila toit mako, ene isosor.

15

Tagham ngar pa tauun mon sov. Tagham ngar pa zetaanja paam

* **14:18:** 2Kor 8:21 * **14:19:** Mbo 34:14; Ro 15:2; Hib 12:14

* **14:20:** Ro 14:14+; 1Kor 8:9, 13 * **14:22:** 1Yo 3:21

¹ Iit tau ghuruun ila toit iyaryaan ne, irau tataghon tauun loloon mako. Iit aat mataan ingal yes tau ghuruun ila toozi iyaryaan soone na, ve tatatan tauun, ve tataghon ngar tau irau lolosi ve ngar toozi, ve tatoova to tapalot zi. *

² Tauvene iit tasov aat tataghon ngar tau iuul zetaanja na, ve tapalot zi pa ngar popoia. Leso tapariaan ghuruun ila toozi. *

³ Agham ngar pa Kriisi. I igham ngar pa tauu mako. Ngar tooni itaghon Maaron alinja ziiri ee tau tiboode na. Isaav tauvene:

“O Maaron, saveen veleghiin tau tisiki payo na, ene izaa tsiau paam.” *

⁴ Maaron alinja isov tau muun tiboode na, ene igheen to ipaduduun ghiit, ve ipalot ghiit. Leso loloon ruru sov, ve tayooz ariaan pa badoon patanani, ve taghur mataan pa saawe to Maaron igham mulin ghiit. *

⁵ Maaron toit ipapalot ghiit, lesa tayooz ariaan pa badoon patanani. I tauu pale igham gham alup lolomim tomania ngar tsiam imin eemon itaghon ngar to Yesu Kriisi. *

⁶ Lesa yam asov lolomim eemon, ve alup avomim, ve apait Tiina toit Yesu Kriisi Taama Maaron pa tapiri ve poia tooni. Onoon.

Kriisi ilam pa yes Yuda mon mako. I ilam pa tamtamon tisov

⁷ Kriisi loolo poia payam, ve igham gham amin le wa. Tauvene yam paam, lolomim poia pa taumim

* 15:1: Ro 14:1; 1Tes 5:14 * 15:2: 1Kor 10:24; Pil 2:4+ * 15:3:

Mbo 69:9; Yo 6:38 * 15:4: Ro 4:23+; 1Kor 10:11; 2Tim 3:16+

* 15:5: Ro 12:16; 1Kor 1:10; Pil 2:2

ve avaghamu poghani gham. Leso apaghazonai Maaron eeza tiina tomania tapiri ve poia tooni.

⁸ Pa yau nasaav payam: Krisi imin besoonja pa yes Yuda, ve igham uraat itaghon saveen mbuaan tau Maaron isavia pa timbuzna na. Leso anoonja ivot, ve ipaghazonai Maaron ighe saveen tooni, ene onoon mon. *

⁹ Ve igham nugh nugh tau Yuda mako na tipait Maaron eeza pa tapiri ve poia tooni. Pasaa, i loolo isaghatin zi, ve ireu sosor toozi. Saveenja tiboode pataghaan tauvene:

“Yau aat napait ghom ila nugh nugh tau Yuda mako na sosozi,

ve nambou mboun to napakur yo ezam.” *

¹⁰ Ve saveen ziiri ite isaav tauvene:

“Yam nugh nugh tau Yuda mako na, asov alup gham tomania Maaron tamtamon tooni, ve tintinmim pani.” *

¹¹ Ve saveen ziiri ite isaav tauvene:

“Yam tau Yuda mako na, asov apakur Maaron.

Yam nugh nugh tau aleep irau taan na, asov ayoor eeza.” *

¹² Propet Isaia paam isavia gabua tane ighe:

“Paaghu ee to Yesi pale ivot gha imin kinik, ve igham pooz pa nugh naol isov.

Nugh nugh tau Yuda mako na, pale tinu-meera, ve tighur matazi pa saawe to i iuul zi tileep poi.” *

* **15:8:** Mbanj 3:25+; 2Kor 1:20 * **15:9:** Mbo 18:49; Yo 10:16

* **15:10:** Lo 32:43 * **15:11:** Mbo 117:1 * **15:12:** Is 11:1, 10; Mt 12:21; Syg 22:16

¹³ Maaron tau iit taghurghur mataan pani ne, pale igham yam tau aghur ila tooni na lolomim poia kat, ve aleep poia toman lolomim luuma. Ve Avuvu Patabuyaaj tapiri ipalot gham. Leso lolomim ruru sov, ve anumeer Maaron kat, ve asaan saawe to i igham mulin ghiit ve taleep poi. Onoon. *

Paulus isavia uraat tooni to votiaaj vaaru poia

¹⁴ Yam tonjetaz, yau nawatagh: Ngar poia ivon ila lolomim, ve aghazoon kat pa Maaron aliija. Tauvene yam asov irau apaduduuj zeetmimja pa saveej tooni. *

¹⁵⁻¹⁶ Yau nawatagh: Ngar siriv tau nabood zi ila rau tane, ene arianazi. Eemon nasavi zi ighazoon payam. Leso napaburigin ngar tsiam muul, ve matamim kisin zi. Pasaa, yau namin neer to watoonrau. Maaron ighur ghau namin besoonja to Yesu Krisi itaghon tauu loolo ve poia tooni. Ve ighur uraat ila nimag to navotia vaaru poia tooni pa nugh nugh tau Yuda mako na. Leso titoor ngar toozi ve tighur ila to Krisi, ve Avuvu Patabuyaaj igham uratoi zi le titaghon ngar patabuyaaj. Mako naghur zi tila pa Maaron timin watoonrau tau ighamu loolo poia kat. *

¹⁷ Yesu Krisi ileep tomani ghau pa uraat to Maaron tau naghhamghamu ne. Tauta napakur ghau pa uraat tsiau tane. ¹⁸ Yau irau avog ila pa saveej ma uraat ite paam ne mako. Uraat tau Krisi ighamu ivot ila nimag, tane mon ta pale nasavia. I tauu ipapalot saveej tsiau ve

* **15:13:** Ro 14:17; 1Kor 4:20 * **15:14:** 2Pe 1:12; 1Yo 2:21

* **15:15-16:** Mban 9:15; Ro 11:13; Ga 2:7+

uraat tsiau. Tauta uraat tsiau ighur anoonja, ve nugh nugh tau Yuda mako na titoor ngar toozi, ve titaghon ngar to Krixi. ¹⁹ Avuvu Patabuyaanj tapiri ighen tsiau, ve saawe tau navotia mos, i ighamgham gabua ngeretazi ve uraat tintiina ivotvot imin ilaal pa tamtamon leso tiwatagh tiche Maaron ileep tomani ghau pa uraat tsiau. Yau napaburigin uraat izi Yerusalem imin maata. Ra nataghon taan nala nala le navot izi taan sirivu to Ilirikum. Nugh tawe tisov tiloon katin vaaru poia to Yesu Krixi wa. *

²⁰ Pasaa, ngar tsiau iyaryaan naghe nugh sindei tau tiloon Krixi vaaru soone, o nala navotia vaaru poia pazi. Yau lolog pa narau ruum izala rir tau tamtamon ite ighelia ne mako. Naghe taug naghelia rir, ve narau ruum izala, o poia. ²¹ Eez tau nataghoni pa uraat tsiau, saveenja ighen ila Maaron aliinja tau tiboode na. Isaav tauvene:

“Tamtamon tau tiloon vaaru soone, ene pale tighita.

Ve yes tau tiloon saveen tooni soone, ene pale tiloonja ve tiwataghi.” *

Paulus ighe ila ighita yes Roma

²² Saawe naol, yau naghe nalat naghit gham. Eemon uraat tsiau to votiaan vaaru poia ikiskis ghau, tauta nalat mako. *

²³⁻²⁴ Eemon aazne, naghita naghe yes to taan sirivu tane, yau leg uraat eta pazi muul mako. Ve naghiam ngar naghe nala pa taan sirivu to Spen ve navotia vaaru poia izi ta sewe. Tauvene yau

* **15:19:** Mbanj 19:11; 1Kor 2:4; 2Kor 12:12 * **15:21:** Is 52:15

* **15:22:** Ro 1:13

aat nalat nagig gham, ve naleep tomani gham rig le isov, o auul ghau pa laghoonj tsiau, ve naburig muul nala pa Spen. Pasaa, ndaman katini, matag ingalngal naghe nalat naghith gham, o poi. *

²⁵ Eemon yau aat nala Yerusalem muunj to nauul Maaron tamtamon tooni ta sewe le isov, o nalat navot tsiam. *

²⁶ Pasaa, yes to Masedonia ve Akaia lolozi ipaza-agh zi gha tigoog maet siriv imin abuzi, ve tighuru ila nimag wa. Tighe naghmu nala, ve naghmu pa Maaron tamtamon tooni tau tileep toman mbo-laanj izi Yerusalem na. *

²⁷ Ngar tane, tauzi lolozi ve tighamu. Ve ene iduduunj. Pasaa, yes Yuda timin eez pa yes tau Yuda mako na gha tigham gabua popoia katini tau iuul zi pa lepoogh to anunuzi. Tauvene isaav ighe yes tau Yuda mako na, matazi ingal yes Yuda pa gabua popoia siriv to taan ve tiuul zi pani, ene poia. ²⁸ Tauvene yau naghe napasov uraat tane, ve naghur maet tau tigooga na ila yes Yerusalema nimazi le isov, mako nalat naghith gham, ve nala pa Spen. *

²⁹ Yau nawatagh: Saawe tau nalat peria tsiam, ene pale poia tiina kat to Krisi izaa tsiam. *

³⁰⁻³¹ Yam tonvetaz, itinja taghur ila to Tiina toit Yesu Krisi, ve Avuvu Patabuyaanj igham ghiit loloon pa tauun. Tauvene yau naghason gham naghe asun Maaron ariaanj, leso imin sigheu payau pa yes to Yudea tau tighur ila mako na.

* **15:23-24:** 1Kor 16:6 * **15:25:** Mbanj 19:21, 24:17 * **15:26:**

1Kor 16:1+; 2Kor 8:1, 9:2, 12; Ga 2:9 * **15:28:** 2Kor 8:20+

* **15:29:** Ro 1:11

Ve iuul ghau pa uraat tau naghe naghamu izi Yerusalem to nauul tamtamon tooni. Leso ilaan poi, ve igham zi lolozi poia. Tauvene aghur ghau ila sunuun tsiam. Leso itinja tazuari ghiit pa ghamuun uraat to Yesu Krisi. *

³² Ve murei, isaav ighe Maaron loolo ighe nalat, ene pale nalat naghit gham toman lolog poia ve namariau. Pale naleep tomani gham rig, ve itinja tavapaloti ghiit, o nala.

³³ Maaron, i igham ghiit taleep poia toman loloon luuma. I tauu pale ileep tomani gham asov. Onoon.

16

Paulus igham aaz poia tooni ila pa yes Roma

¹⁻² Yau naghe napaes payam pa livuun Fibe. I livaa poia ee tau iuluul lupuun to Krisi izi nugh Kenkria. Iuluul eval tiina, ve iuluul ghau paam. Tauvene saawe tau ilat tsiam, aghamu toman lolomim poia, ve yamja aleep. Ve isaav ighe i le patanjani eta, o auule. Pa iit tamtamon to Maaron irau tataghon ngar tauvene.

³ Agham aaz poia tsiau ila pa Prisila yesuru azaawa Akwila tau yenja niluplup ghei pa uraat to Yesu Krisi na. *

⁴ Yesuru tirei tauzi payau, ve rigmon kanan timaat. Tauvene lolog poia kat pazi ve napait zi. Ve yau mon mako. Lupuun tisov to yes tau Yuda mako na, lolozi poia pazi ve tipait zi paam.

⁵ Ve lupuun to Krisi tau tiluplup zi ilonj ila yesuru ruum toozi na paam, agham aaz poia tsiau ila pazi.

* **15:30-31:** 2Kor 1:11; Kol 4:3 * **16:3:** Mbanj 18:2, 26; 2Tim 4:19

Ve aaz poia tsiau ila pa Epenetus paam. Yau lolog igheen tooni kat, ve i njeer tau imuun pa tamtamon tisov to Asia, ve ighur ila to Krisi imin maata. *

⁶ Agham aaz poia tsiau ila pa Maria. Yau nawatagh: I igham uraat tiina ila sosomim to iuul gham. ⁷ Ve aaz poia tsiau ila pa Andronikus yesuru Yunias. Yesuru tonjetaz tsiau, ve muun yenja nileep ila ruum to yavyavuun loolo. Tamtamon tighit zi tighe yesuru mbanjoona popoia kat to Krisi ve tiliiv mbanjoona siriv. Ve yesuru timin Krisi le imin maata, ra yau anag.

⁸ Agham aaz poia tsiau ila pa Ampliatus paam. Pa Tiina toit ilup ghei, tauta lolog igheen tooni kat.

⁹ Ve aaz poia tsiau ila pa etaan Urbanus tau itinja taluplup ghiit pa uraat to Krisi na, ve ila pa etag ite Stakis paam. Pa yau lolog igheen tooni kat.

¹⁰ Agham aaz poia tsiau ila pa Apeles. I njeer poia ee tau itaghon katin ngar to Krisi. Ngar ve uraat tau ighamu na, ene itotoia ighe i irao. Ve aaz poia tsiau ila pa zetaanna tau tileep tomania Aristobulus ila ruum tooni na paam. ¹¹ Agham aaz poia tsiau ila pa tonjetaz tsiau Erodion. Ve aaz poia tsiau ila pa Narsisus tomania tamtamon tooni tau timin Tiina toit Yesu le na paam.

¹² Agham aaz poia tsiau ila pa Tripena yesuru Triposa. Pa zilivaa ru tana, yesuru tirav tauzi kat pa uraat to Tiina toit. Ve aaz poia tsiau ila pa Persis paam. I livaa ite tau igham uraat maata maata pa Tiina toit. Tauta lolog igheen tooni kat.

¹³ Agham aaz poia tsiau ila pa Rupus yesuru tiina paam. Rupus, Tiina toit Krisi isiigho imin le wa. Ve

* **16:5:** 1Kor 16:15

naghita tiina imin yau tinan paam. *

¹⁴ Ve agham aaz poia tsiau ila pa Asinkritus, Pelegon, Hermes, Patorobas, Ermas, ve tonvetaz siriv to Krisi tau yesja tilepleep na paam. ¹⁵ Ve aaz poia tsiau ila pa Pilologus, Yulia, Nereus yesuru liivu, ve Olimpás, tomania tamtamón tísov to Maaron tau yesja tilepleep na paam.

¹⁶ Yam asov amin tonvetaz to Krisi wa. Tauvene lolomim poia pa taumim ve avataki nimamim. *

Lupuun to Krisi tau tileep irau taan sirivu tane, tísov tigham aaz poia toozi payam paam.

Saveen palotiin siriv

¹⁷ Yam tonvetaz, ayamaan gham pa yes tau tizoor saveen tau tipaduduun gham pani na, ve tireureu lupuun tsiam, ve tighamgham tamtamón titap pa ghuruun ila toozi. Zeran tauvena, aleep soghan pazi. *

¹⁸ Pa yes tibeas pa Tiina toít Krisi mako. Titaghon ngar to ulizi mon. Saveen toozi, ene ngoreenja kat. Tauta ighamgham tamtamón tau lezi ghilaloon mako na lolozi, ve titaptap pa ghuruun ila toozi. *

¹⁹ Yam, tipaesia varumim irau nugh tigde ataghon dudunai Krisi saveen tooni. Tauta agham ghau lolog poia kat. Ve naghe ngar saghati eta

* **16:13:** Mk 15:21 * **16:16:** Paulus ibood saveen tauvene: 'Avaghani avomim.' Ene eez toozi tau titotoi tigde lolozi pa tauzi. Ve iit tagham tauvene mako. Tayanin pa tamtamón ve itinja tavataki nimaan. * **16:17:** 2Tes 3:14; Tit 3:10; 2Yo 10 * **16:18:** Pil 3:18+; Kol 2:4; 2Pe 2:3

igheen tomani gham sov. Ve ngar popoia, o aghi-laalo ve akisi. *

²⁰ Maaron toit, i igham ghiit taleep poia toman loloon luuma. Malau mako pale iuul gham, leso atatan Sadan tapiri ve avaghaaza ila aghemim saamba. *

Poia to Tiina toit Yesu Krisi igheen tomani gham.

²¹ Timoti, tau yeiru niluplup ghei pa uraat to Krisi ne, igham aaz poia payam. Ve tonvetaz tsiau tol, Lusius, Yason, ve Sosipater, aaz poia toozi ilat payam paam. *

²² Ve yau Tertius paam, naghamaaz poia tsiau ilat payam ila Tiina toit eeza. Paulus isavsaav, ve yau nabadbood saveen tooni ila rau tane.

²³ Gaius paam igham aaz poia tooni ilat payam. I ta igham ghau naleep tomania ila ruum tooni. I ingin poghani ghau tomania tamtamon tisov to Krisi tau tiluplup zi pa sunuun ila ruum tooni na. Ve Erastus tau ingin maet to nugh tane, yesuru tonvetaz toit Kwartus tigham aaz poia toozi payam paam. *

²⁴ Poia to Tiina toit Yesu Krisi aat iza tsiam. Onoon.

Paulus ipait Maaron eeza

²⁵ Vaaru poia to Yesu Krisi tau yau navovotia ne, Maaron pale ipalot gham pani, leso ayooz ariaan. Onoon, muun geeg ve ilam, vaaru poia tane ivot ighazoon mako. *

* **16:19:** Mt 10:16; Ro 1:8; 1Kor 14:20 * **16:20:** Gnp 3:15; Syg 12:11 * **16:21:** Mbanj 16:1, 20:4 * **16:23:** Mbanj 19:29; 1Kor 1:14 * **16:25:** 1Kor 2:7; Ep 3:9; Kol 1:26+; 2Tim 1:9+

²⁶ Eemon yes propet tibood saveeṇa. Ve aazne, Maaron maata yaryaare tau ileep le alok na, ivotia ighazonṇ wa. Ve i isaav ariaaṇ ighe saveeṇ tane ila irau nughmarinṇ. Leso tighur ila to Kriṣi, ve titaghon saveeṇ tooni. *

²⁷ Maaron ite paam mako. I zigani. Ve ṇgar tooni, ene tiina le tiina kat. Tauvene iit aat tapaiti pa tapiri ve poia tooni ila Yesu Kriṣi eeza taghon taghon gha ila. Onoon.

* **16:26:** Ro 1:5; Tit 1:3

Maaron Saveen Tooni Patabuyaana
The New Testament and portions of the Old Testament
in the Tuam dialect of the Saveeng language of Papua
New Guinea. The Saveeng language is also called the
Mutu language.

Sampela hap Buk Baibel long tokples Saveeng Tuam
long Niugini.

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

PDF generated using Haiola and XeLaTeX on 11 Nov 2022 from source files dated 9 Oct 2020

adb844f0-d769-5b05-9dd0-7c01fca938bb